

ಕರ್ನಾಟಕ ಸರ್ಕಾರ



# ಚಿಲಗಾರ ಜೊತೆ ಜೊತೆ

[ಕವಾ ಜೊಜೆ]



ಕರವಟ್ಟಿಲರ ಬಿ. ಐಯ್ಯಣ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕಲಿ



# ಚಿಂಗಾರ ಪೊಟ್ಟಿ

[ಕವನ ಜೊಪ್ಪೆ]

ಎಳ್ಳಾ :  
ಕರವಟ್ಟೀರ ಬಿ. ಐಯ್ಯಣ್ಣ  
ಚೆನ್ನಂಗಿ

ಬೊಳಿಪಡ್ತಾನವು :  
ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,  
ಮಡಿಕೇರಿ

'CHINGARA POTTI' Collection of Poems in Kodava language written by Karavattira B. Aiyanna, Chennangi Village, Chennayana Kote, Published by 'Karnataka Kodava Sahitya Academy.

ಪ್ರಕಟಣೆ : 2016

ಪ್ರತಿ : 500

ಕ್ರಯ : ಉ. 50/-

Price : Rs. 50/-

ಪಾಳೆ : 70

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್. All Rights Reserved.

ಪ್ರಕಟಣಾ ಸಮಿತಿ :

ಬಿದ್ದಾಟಂಡ ಎಸ್. ತಮ್ಮಯ್ಯ

ಅಧ್ಯಕ್ಷ

ಉಮರಬ್ಬ

ರಿಜಿಸ್ಟ್ರಾರ್

ತೀತಿರ ಡಾ. ರೇಖಾ ವಸಂತ್

(ಸಂಚಾಲಕಂಗ)

ಮುಲ್ಲೇಂಗಡ ಬೇಬಿ ಚೋಂದಮ್ಮ

ಬೋಪಯ್ಯ ಚೋವಂಡ

ಮೇಚಿರ ಡಾ|| ಸುಭಾಷ್ ನಾಣಯ್ಯ

ಚೀರಮ್ಮನ ವಾಣಿ ಚಂಗುಮ್ಮಯ್ಯ

ಬೋಳಿಪಡ್ತನವು :

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ. ಮಡಿಕೇರಿ

ಸ್ಕೌಟ್ ಭವನ, ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ - 571 201

ದೂ. : 08272-229074

ಅಚ್ಚೆಕಾರ :

ಶ್ರೀ ಕೃಷ್ಣ ಕಂಪ್ಯೂಟರ್ಸ್ & ಪ್ರಿಂಟರ್ಸ್,

ಜೂನಿಯರ್ ಕಾಲೇಜ್ ರೋಡ್, ಮಡಿಕೇರಿ, ಕೊಡಗು

Ph : 08272-224919, 9448135592

## ಅಧ್ಯಕಂಡ ತಕ್ಕ

ಕೊಡವ ತಕ್ಕ ತಾಂಡದೆ ಆನ ಇತಿಹಾಸ, ಹಿನ್ನೆಲೆ ಉಂಡ್. ಅನಾದಿ ಕಾಲತಿಂಜಿ ಇಲ್ಲಿಯತ ಮೂಲನಿವಾಸಿಯ ಬಳಸಿಯಂಡ್ ಬಂದ ಭಾಷೆ ಕೊಡವ ತಕ್ಕ. ಕೊಡವ ಪಿಂಞ ಕೊಡವ ತಕ್ಕ ಪರೆವ ಎಲ್ಲಾ ಜನಾಂಗಕಾರಳ ಅಣ್ಣ-ತಮ್ಮಣಂಗಡ ಮಾದರಿ ಪುಡ್ಚಿ ಬೆಪ್ಪಲ್ಲಿ ತಕ್ಕರ ಮಹತ್ವ ಬಲ್ಯದ್. ಇನ್ನತ ಕೊಡವ ತಕ್ಕ ಬೊಳಿಯಂಡೂಂದ್ ಕಂಡಕ ಏರ ಸಾಹಿತ್ಯ ಪೊರಬೂವಂಡು. ಈ ನೊಟ್ಲ್ ಕರ್ನಾಟಕ ಸರ್ಕಾರ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ರಚನೆ ಮಾಡಿತ್ ಸಾಹಿತ್ಯಕ್ ಏರ ಒತ್ತ ಕೊಡ್ತಂಡುಂಡ್. ಈ ಮೊಟ್ಲ್ ಕೊಡವ ತಕ್ಕರ ಪಲತರ ಸಾಹಿತ್ಯತನ ಪುಸ್ತಕ ರೂಪತ್ ಪ್ರಕಟ ಪಡ್ತುವದ್ ಅಕಾಡೆಮಿರ ಉದ್ದೇಶ.

ಚುಮ್ಮಿ ಬಯತ್ಲೇ ಪ್ರತೀ ಬಾಲೆಕಾರ ಬಾಲೆಕಾರ್ತಿಯಡ ಎದೆರೊಳ್ಳಲ್ ಕವನ ಅಡಂಗಿತಿಪ್ಪ. ಇನ್ನತ ಉದಯೋನ್ಮುಕ ಪ್ರತಿಭೆಯಳ ಕಂಡ್ಪುಡ್ಚಿ ಅಯಿಂಡ ಎಳ್ತನ ಅಚ್ಚಿ ಮಾಡಿತ್ ಓದುವಯಿಂಡ ಮನೆಕೆತ್ತಿಚಿಡುವ ಕಾರ್ಬಾರ್ನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಮಾಡಿಯಂಡ್ ಉಂಡ್ ಎಣ್ಣಾತ್ ದಂಡ್ ತಕ್ಕ ಇಲ್ಲೆ.

ಇಕ್ಕಾಕಣೆ ಸುಮಾರ್ ಇನ್ನತ ಕವನ ಸಂಕಲನ ಪಿಂಞ ತರಾವರಿ ಎಳ್ತರ ಪುಸ್ತಕತನ ಬೊಳಿ ಪಡ್ತನ ಕೇಳಿ ಕೊಡವ ಅಕಾಡೆಮಿರದ್. ಇಕ್ಕ ಬೊಳಿಕಂಡಂಡುಳ್ಳ ಕರವಟ್ಟೀರ ಬಿ. ಅಯ್ಯಣ್ಣ ಅಯಿಂಗ ಎಳ್ತನ 'ಚಿಂಗಾರ ಪೊಟ್ಟಿ' ಎಣ್ಣುವ ಈ ಪುಸ್ತಕತ್ ಸುಮಾರ್ ಕವನ ಎಲ್ಲಾ ಸಂಸಾರತನ ನಂದ್ ಮಾಡುವದ್ ಪಿಂಞ ನಂಗಡ ದೇವಳತಾರ ಚರಿತ್ರೆಯೂ ಆಯಿತುಂಡ್. ಮಿಂಞಾಕ್ ಇನ್ನತ ಕವನ ಸಂಕಲನ ಇಂಞಚ್ಚಕ್ಕೂ ಬರಡ್, ಎಳ್ತಕಾರಂಗ್ ಶುಭಾಶಯ.

ಈ ಪುಸ್ತಕತನ ಪೊರ ಬೂಕುವಕ್ ಸಹಕಾರ ಮಾಡ್ನಂತ ಅಕಾಡೆಮಿರ ರಿಜಿಸ್ಟ್ರಾರ್, ಪುಸ್ತಕ ಪ್ರಕಟಣಾ ಸಮಿತಿರ ಸಂಚಾಲಕಿ ಡಾ. ತೀತಿರ ರೇಖಾ ವಸಂತ್ ಪಿಂಞ ಪ್ರಕಟಣಾ ಸಮಿತಿ ಸದಸ್ಯಂಗಕ್ ಅಕಾಡೆಮಿರ ಎಲ್ಲಾ ಸದಸ್ಯಂಗಕ್, ಈ ಪುಸ್ತಕತರ ಕವನತನ ಎಳ್ತತ್ ಅಚ್ಚಿ ಮಾಡುವಕ್ ಅನುಮತಿ ತಂದ ಪುಸ್ತಕತರ ಎಳ್ತಕಾರ ಕರವಟ್ಟೀರ ಬಿ. ಐಯ್ಯಣ್ಣ, ಕರಡ್ ಪ್ರತಿನ ತಿದ್ದನ ಸಾಹಿತಿ ಕಾಲೂರ್ ನಾಗೇಶ್ ಅಯಿಂಗಕೂ, ಅಂದೋಡೆ ಅಚ್ಚಿ ಮಾಡ್ನ ಶ್ರೀ ಕೃಷ್ಣ ಪ್ರಿಂಟರ್ಸ್ ಅಯಿಂಗಕೂ, ಈ ಪುಸ್ತಕ ಪ್ರಕಟಣೆಕ್ ಪ್ರತ್ಯಕ್ಷವಾಯಿತೂ, ಪರೋಕ್ಷವಾಯಿತೂ ಒತ್ತಾಸೆ ತಂದ ಎಲ್ಲಾರ್ಕೂ ವಂದನೆ ಬಯಂದವಿ.

— ಬಿದ್ದಾಟಂಡ ಎಸ್. ತಮ್ಮಯ್ಯ  
ಅಧ್ಯಕ್ಷ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ



# ಎಳ್ಳಾಕಾರಂಡ ತಕ್ಕ

ಆತ್ಮೀಯ ಓದುಗಾಭಿಮಾನಿಯಲೇ,

ನಮಸ್ಕಾರ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಂಜ ಬೊಳಿಕಂಡಂಡುಳ್ಳ 'ಚಿಂಗಾರ ಪೊಟ್ಟಿ' ಕವನ ಸಂಕಲನ ಇದ್ ನಾಡ ಮೂಂದನೆ ಪುಸ್ತಕ. ಆದ್ಯತ್ 'ನಾಡ್‌ಮದ್ದ' ಪಿಂಇ 'ಕೊಡಗ್‌ರ ಮರಕಾಡ್' ಈ ದಂಡ್ ಪುಸ್ತಕ ಬೊಳಿ ಕಂಡಿತ್. ಕೂಟ್‌ಕ್ ಮಡಿಕೇರಿ ಆಕಾಶವಾಣಿಲೂ ಸುಮಾರ್ ಒಯಿಂಬದ್ ಕಾರ್ಯಕ್ರಮತ್‌ನ ಕೊಡ್ತಿಯೆ. ಈ ಪುಸ್ತಕ ಪ್ರಕಟಣೆಕ್ ಒತ್ತಾಸೆ ತಂದ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷ ಪಿಂಇ ಸದಸ್ಯಂಗಕ್ ನಾನ್ ಎಂದೂ ಆಭಾರಿ.

ಸಾಹಿತ್ಯಾಭಿಮಾನಿಯ ಎಲ್ಲರೂ ಈ "ಚಿಂಗಾರ ಪೊಟ್ಟಿ" ಕವನ ಸಂಕಲನತ್‌ನ ಎಡ್‌ತಂಡ್ ಓದಿ. ಇದ್ ನಿಂಗಡ ಬಟ್ಟೆಕ್ ಬೊಳಿ ಆಕೂಂದ್ ನಾ ಬಯಂದವಿ.

- ಕರವಟ್ಟೀರ ಬಿ. ಐಯ್ಯಣ್ಣ  
ಚೆನ್ನಂಗಿ ಗ್ರಾಮ

# ಒಳ್ಳೆ ಪಾಳೆಲ್

ಗಜಮುಖಿ ಗಣಪತಿ	1
ಯೋಧಂಗ್ ವಂದನೆ	2
ತುಳಿ ಕವನ	3
ವಾತಾಪಿ ಗಣಪತಿ	6
ಗೆಜ್ಜೆ ತಂಡ್	7
ತೆರೆ ಆಡ್‌ಚಿ	8
ನೀ ದಾರೊ?	9
ಮಮ್ಮ ಮೂಡಿ	10
ನೇರ್ ಪೆರಿಪವ	11
ಜಮ್ಮಕಾರಿ	12
ಲೇಲಾಲೇ ಪಾಟ್	13
ಹೇ ಮನ್‌ಪ	14
ನಾಕಂಡ ಕೆಟ್ಟ ಸ್ವಪ್ನ	14
ಪಜ್ಜಿರ ಗೌಜಿ	15
ಬಕಾಸುರ ಬಂಡೆಕಲ್ಲ್	16
ಚಿಂಗಾರ ಪಾಟ್	17
ಅಮ್ಮ	18
ಬದ್‌ಕ್	19
ಪೊಣ್ಣ್ ಜನ್ಮ	20
ಜೀವನ	21
ಅಜ್ಜಂಡ ಬೋಧನೆ	22
ಭಂಡ	23
ತಂಗಾಳಿ	24
ಕೊಡಲಿರ ಪೊಯಿತ್	25
ಲಕ್ಷ್ಮಣ ತೀರ್ಥ	27
ಚಕ್ಕೆ ಪಣ್ಣ್	28
ಪೊಂಗುಳ್ಳೆ ನೀ ಕೇಳ್	29
ಇದ್ ನಾಡದ್	30
ಪೊಂದೇನ್	31
ಓ ಪಟ್ಟತಿ ಪಯ್ಯು	32



ಪೊಣ್ಣೆನ್ನ ಆಣೆನ್ನ	33
ಕೋಲ್ ಪೊಯ್ಯವೊ	34
ಜೋಡಿ ಪಕ್ಷಿ	35
ವೀರ ಪಡೆಯಾಳಿ	36
ಮಳೆರಾಯ	37
ಕವಿರ ಆಸೆ	37
ಮಲ್ಲಿಗೆ ಮಮ್ಮ	38
ಕಲಿಯುಗತ್ ಪೊಣ್ಣ್	39
ಮಾಯಿಯು ಮೈಮಳು	39
ಚಾಕ್ರರ ಶೋಕಿ	40
ಪೊಣ್ಣ್ ಜನ್ಮ ಒರ್ ಶಾಪ ಎನ್ನಂಗ್	41
ಪತ್ತ ಪೆತ್ತ ಮುತ್ತೈದೆ	42
ತೊಡೆ ಕೆಟ್ಟು ತುಂಡ್ನ ಎತ್ತ	43
ಮೇಕೆ ಮನೆಕ್ಕಾರಿ	44
ಎದ್ದ ಬಾ ಇಗ್ಗುತ್ತಪ್ಪ	45
ಈಶ್ವರಂಡ ಆಟ್	46
ಬೋರೆ ಎದ್ ಸಾಟಿ	47
ಬಾ ಒಮ್ಮ ನಾಗದೇವ	48
ಸೃಷ್ಟಿಕರ್ತ	49
ಡೌರಿ	50
ಪೊಂದೇವಿ	51
ಬಣ್ಣತ ಪುತ್ತರಿ ಬಾತ್	52
ಓದ್ನ ಪೊಣ್ಣ್	53
ನಾನ್ ಪಂಜರತ ಗಿಣಿ	54
ಎಂಜಿಪೊರ್ಕಿಯ	55
ನರಿ ನಾಡ್ಕ್ ಬಪ್ಪ	56
ಯವ್ವನ ದುಂಬುನ ಆಸೆ	57
ಕಾವೇರಮ್ಮೆಕ್ ಮಂಗಳಂ	58
ಗಣಪತಿರ ಶೃತಿ	59
ಗೋ ಹತ್ಯೆ ಮಹಾ ಪಾಪ	60
ಪಾಡಿ ಇಗ್ಗುತ್ತಪ್ಪ	61
ಪುತ್ತರಿರ ಏಳಕ್ಕಿ ಪುಟ್ಟ	62
ಕೊಡಗೇ ಚಾಯಿ	63

## ಗಜಮುಖ ಗಣಪತಿ

ಗಜಾನನಂ ಭೂತಾಗಣಾದಿ ಸೇವಿತಂ ಪ್ರತಿಷ್ಠ ಜಂಭೂಫಲ ಸಾಧಕಂ  
ನಮಾಮಿ ವಿಘ್ನೇಶ್ವರ ಪಾದ ಪಂಕಜಂ

ಬೋಡ್‌ವಿ ನಾ ನಿನ್ನ ಆನೆ ಮೂಡ್ ಗಣಪ  
ಬೋಡ್‌ನ ಈ ತಡಿಕೆ ಸುಖ ತಾರೋ ಗಣಪ  
ಪಾಡ್‌ವೀ ನಾ ನೀಡ ಕೇಳಿನಾ ಗಣಪ  
ಪಾಟ್‌ರ ತಾಳಕ್ ಆಡಿ ಬಾ ಗಣಪ  
ಬೋಡ್‌ವಿ ನಾ ನಿನ್ನ ಆನೆ ಮೂಡ್ ಗಣಪ

ಈಶಂಡ ಮೋಂವನೆ ಗಜಮುಖ ಗಣಪ  
ವೇಷತ್ ನೀ ಕೂಡ ತಡಿ ಬಲ್ಯ ಗಣಪ  
ರೋಷ ನೀಕುಂಡ್ ಅದಿಯಾಯಿ ಗಣಪ  
ಪಾಷ ಬುಡತೆ ನೀ ಕಾಪಾಡ್ ಗಣಪ

ಬೋಡ್‌ವಿ ನಾ ನಿನ್ನ ಆನೆ ಮೂಡ್ ಗಣಪ  
ಮೊರತಗಲ ಕೆಮಿ ನೀಡ ಮಧ ಗಜ ಗಣಪ  
ಮೂಶಿಕಂಡ ಬೆನ್ನಲ್ ಅಳ್ತ ವಾತಾಪಿ ಗಣಪ  
ಕೈಲಾಸತೂ ನೀಕುಂಡು ಆದ್ಯ ಪೂಜೆ ಗಣಪ  
ದ್ವೇಷ ನೀ ಬರಿಕ್‌ಟ್ ಕಾಪಾಡ್ ಗಣಪ  
ಬೋಡ್‌ವಿ ನಾ ನಿನ್ನ ಆನೆ ಮೂಡ್ ಗಣಪ

\* \* \* \* \*



# ಯೋಧಂಗ್ ವಂದನೆ

ಭಾರತ ತೆರಿಲಳತ್ತ ಯೋಧನೇ

ನೀಕಿದಾ ನಾಡ ವಂದನೆ.

ನೀ ಬರಿ ಬರಿಯ ತಿರಿನೋಟ್,

ನೀಕ್ ಕಾಂಬದೇ ದುಷ್ಕರ್ಮಿಯಡ ಕೂಟ್

ಭಾರತ ತೆರಿಲಳತ್ತ ಯೋಧನೇ ನೀಕಿದಾ ನಾಡ ವಂದನೆ.

ಕಾಶ್ಮೀರ ಕಣಿವೆಲೂ ಚೈನಾ ತೆರಿಲೂ

ಅಸ್ಸಾಂ ಗಡಿಲೂ, ಉಂಡ್ ದುಷ್ಕರ್ಮಿಯ

ಈಯಂಡ ಕಣ್ಣೆಲ್ಲಾ ಭಾರತ ಮಣ್ಣೆರ ಮೇಲೆ

ಬೈಯ್ಯಿ ಬೊಡಿ ಅಯಿಂಗಡಾಲೆ

ಭಾರತ ತೆರಿಲಳತ್ತ ಯೋಧನೇ ನೀಕಿದಾ ನಾಡ ವಂದನೆ.

ಯುದ್ಧ ತೀರಣೆ ನೀಕಿಲ್ಲೆ ವರ್ಕ್

ನೀ ವರ್ನಕ ನಂಗಕ್ಕೆಲ್ಲಾ ಬಿರ್ಕ್

ನೀಡ ಎದೆ ಧೈರ್ಯಕ್ ಕೂಟ್ ಚುರ್ಕ್

ಭಾರತ ತೆರಿಲಳತ್ತ ಯೋಧನೇ ನೀಕಿದಾ ನಾಡ ವಂದನೆ.

ಎಲ್ಲಾ ಮನೆಕ್ಕೊರ್ ಯೋಧಂಗ ತೆರಿಕ್ ಪೋಂಡು

ಭಾರತ ಮಣ್ಣೆನ ಕಾಪಾಡೊಂಡು

ಶೂರತನತ್ ಪೋರಾಡೊಂಡು

ಕೊಡವ ಚೋರೆರ ಭೀರ್ಯತ್ನ ಕಾಟೊಂಡು

ನೀ ಬರಿಬರಿಯ ತಿರಿತ್ ನೋಟ್

ನೀಕ್ ಕಾಂಬದೇ ದುಷ್ಕರ್ಮಿಯಡ ಕೂಟ್.

ಭಾರತ ತೆರಿಲಳತ್ತ ಯೋಧನೇ ನೀಕಿದಾ ನಾಡ ವಂದನೆ.

\* \* \* \* \*

## ತುಳಿ ಕವನ

ದೇವಳ ತೊಕ್ಕತೆ ಬಾವಕ್ ಬೊತ್ತುವೊ  
ಜೀವ ಎನ್ನಂಗ್?  
ಜೀವ ಕೊಡ್ತ ದೇವಳೇ  
ಎಲ್ಲಾಂಗೂ ಮುಂಬು.

ಕೆತ್ತೆ ಕಾಲಾಯಿತ್  
ಮೆತ್ತೆ ಪತ್ನಕ  
ಮೆತ್ತೆಯೂ ಆಪ ಕೆತ್ತೆ.

ಪಂಚಪಾಂಡವಕ್  
ವಂಚನೆ ಮಾಡ್ನ  
ಕೌರವಂಗಡ ಗತಿ ಎನ್ನಾಚಿ.

ಪಚ್ಚಿ ನೀರ್ಕ್ ಕೈ ಬೇವಾಂದ್  
ಕೊಚ್ಚಿ ನೀರ್ಕ್ ಆಸೆ ಪಡತೆ  
ಮೇಲೆಲ್ಲಾ ಕಿಚ್ಚಿರ ಕಜ್ಜಿಯಾಪ.

ಕಲ್ಲೆರ ಪೂವುನ ಬೆಲ್ಲಾಂದ್ ಕಡ್ಚಕ  
ಪಲ್ ಮುರಿಯುವದಂತೂ ಖಂಡಿತ.  
ದೇವಳೇ ಇಲ್ಲೇಂದ್ ಬೀರ್ಯ ಕಳ್ಚಂವೂ  
ಒನ್ನಾಂದ್ ಚಾವ ನೇರಕ್  
ರಾಮಾ, ರಾಮಾಂದ್ ಪ್ರಾಣ ಬುಟ್ಟತಲೊ  
ಗೋವುಗಳ ತಿಂಗತಿ,

ಜೀವ ಕೂಟುವಕ್ ಪಾಲ್ ತಪ್ಪದೇ ಗೋವು  
ಬಾವಳ ಬಟ್ಟೆಕ್ ಅದೇ ಮೇವು.  
ನಾಡ್ ಓಡುವಕ ನಾಡ್‌ರ ನಡುವೆ ಓಡ್  
ಇಲ್ಲೇಂಗಿ ಜೋಡ್ ಬೊಡೆಕ್  
ತಯ್ಯಾರಾಯಿತಿರ್.

ಕೂಳ್ ತಂದವನ ಕುತ್ತಪರಿಯತೆ  
ಪಾಳ್ ಪರ್ದೆಶಿಯಡ  
ಪಳಮೆನ ಕೇಕತೆ.

ಮನುಷ ಜನ್ಮ ಇದ್ ನಲ್ಲ ಜನ್ಮ  
ಮನುಷನಾಯಿತ್ ಪುಟ್ಟಿತ್  
ನೀ ಮಾಡ್ ನಲ್ಲ ನಲ್ಲ ಕರ್ಮ.

ಅಪ್ಪ ನಟ್ಟ ಆಲ ಮರಾಂದ್  
ಕೆಪ್ಪರ ತಿಂದಿತ್ ದೊಪ್ಪರ ಬುದ್ಧಂಡಕ  
ಜಪ್ಪಾರ್ ನೀಕಿಲ್ಲತಾಪ.



ಓದಂಡು ಎಳ್ಳಂಡು ಚೋದಾನ ಎಳ್ಳ  
ಅದ್ ಬೋದನೆಕ್  
ಆದಿಯಾಯಿತಿಕ್ಕಂಡು.

ಆಳ್‌ಂದೆಣ್ಣಂಡ್ ಗೋಳ್ ಕೆಟ್ಟತೆ  
ಬಾಳಿ ಬದ್‌ಕುವ ಬಟ್ಟೆಕ್  
ಆಳೂ ಒರ್ ನಲ್ಲ ಬಾಳ್.

ಕಳ್ಳಂಡ ಪೋಣ್ಣ್ ಮುಂಡೆಯಾಪ.  
ಬೊಳ್ಳಂಡ ಪೋಣ್ಣ್ ಬಂಜೆಯಾಪ.  
ಕುಳ್ಳಂಡ ಪೋಣ್ಣ್ ಕಾಳಿಯೆತಾ ನಾಪ.  
ಬಟ್ಟೆ ಬದ್‌ಲ್ ಮಾಡಲು  
ರಟ್ಟೆ ಗಟ್ಟಿ ಮಾಡಲು  
ಕಟ್ಟೆ ಒಡಂದ್ ಪೋನ ಪಿಂಚ  
ಮಟ್ಟೆ ಇಟ್ಟಿತೆನ್ನ ಸುಖ.

ಪೊಂಗುಂಚ್ ಆಚೀಂದ್  
ಅಂಗ್ರಾಣೆ ನೀಕೆನ್ನಂಗ್  
ಪೋಣ್ಣ್ ಸಂಸಾರತ್‌ರ ಕಣ್ಣ್.  
ಆಂಗುಂಚ್ ಆಚೀಂದ್ ಅಹಂಕಾರತ್ ಮೆರೆಯತೆ  
ಆಣ್ ಪಡೆಕಲ್ಲತೆ  
ನೀಕ್ ಎಡೆ ಬೆಪ್ಪಕಂತೂ ಎತ್ತುಲೆ

ಮುಳ್ಳೈ ಮೂಡ್‌ಕ್ ಮುಟ್ಟುವಕ  
ತಳ್ಳಿ ಬುಡತೆ  
ಮುಳ್ಳೈನ ಕೆತ್ತಿ ನೀಕ್  
ಬಯ್ಯ ಬಪ್ಪವೆಂಗೂ ನಲ್ಲವಾಪ.  
ಚಲ್ಲ ಕಳಿ ನಲ್ಲದಲ್ಲ ಪಲ್ಲ ಬೂವ ಜೋಕೆ  
ಬೆಲ್ಲ ಕರುವಾಂಗಿಂಚ್ ಮಿಂಚ  
ತಿಂಬಕ್ ತಯಾರಾಯಿತಿರ್.

ಪೊನ್ನ ಪಣತ್‌ರಾಸೆ ನೀಕೆನ್ನಂಗ್  
ಕಣ್ಣ್‌ಕ್ ಕಣ್ಣಾಯಿತುಳ್ಳ  
ನೀಡೆ ಪೋಣ್ಣ್‌ಂಜ ಪಿಂಚ  
ಗಟ್ಟಿಗ ನಾನೊಬ್ಬನೆಂದ್ ಲೊಟ್ಟಿ ಬುಡತೆ  
ನೀಕಿಂಜ ಗಟ್ಟಿಗನೊಬ್ಬ  
ಈ ಲೋಕತ್‌ಲಿಕ್ಕು

ಬಲ್ಯವಂಡ ಕಳ್ಳ ಕಳಿ ಪಾಟ್‌ರೆನೆಕೆ  
ಗಲ್ಲಿಕೆತುವಕಾಪಕ  
ಬಲ್ಯವನೆಲ್ಲಿ ಬಕ್ಕು.

ಬೊಳ್ಳೆ ಕಳ್ಳರ ಚೋದ್ ಬೊಳ್ಳೆಗನ್ನೆ ಗೊತ್ತ  
ಚೆಳ್ಳೆಕ್ ಬೂಕ್‌ನ ಪಿಂಚಾ  
ಗೊತ್ತಾಪ ಆಂಡ ಗತ್.

ಪಿಲ್ಲ ಭೂತನ ಕಂಡಿತ್  
ಕಲ್ಲಾಯಿತ್ ನಿಂದನೆಕೆ

ಕಾಡ್‌ಲೇ ಪುಟ್ಟಿತ್ ಕಾಡ್‌ಲೇ ಬೊಳಂದ  
ಪಿಂಚಾ ಕೇಡ್ ಮಾಡತಿಕ್ಕುವಾ?

ಕಾಟ್‌ಮೂರ್ಕನ ಕೊದ್‌ಚಿ ಮುತ್ತಟ್ಟಕ  
ಕೊರ್‌ಚಿ ಕೊಂದೇ ಬುಡುವ.

ತಪ್ಪುಂದರಂಜಿತ್  
ತಪ್ಪು ಮಾಡುವವಂಡ  
ನಿಪ್ಪುಲ್ ಶನಿ ಅಳೆತಿತ್ತಿಪ್ಪ

ಚಾಕ್‌ನ ಪಂದಿಕ್ ತೋಕೆನ್ನಂಗ್?  
ಊಕ ಕೂಟಿತ್

ಮತ್ತೆ ಕಾವು ತೋಕ್ ಪೊಯಿತೇ ಮದಿ.

ಸುಂಕತಂವಂಡ ಕೂಡ

ಸುಖಿ ದುಃಖಿ ಎನ್ನಂಗ್?

ಮಂಕ್ ಮಾಡುವ ನಿನ್ನ ಮೂಂದುರುಪಿಯಕ್

ನುಗ್ಗೆ ಮರ ಬಗ್ಗೆಚೇಂಗಿ ಕಾಯಾಪ

ಮಕ್ಕಳ ಪೊಜ್ಜಿತ್ ಬೊಳ್‌ತನಕ

ನಲ್ಲ ಆಳಾಪ.

ಕುಡಿಪ ನೀರ್‌ನ ತಡ್‌ಕತೆ

ನಡ್‌ಪ ಬಟ್ಟೆನೆ ಕೆಟ್ಟತೆ

ಗುರುಮನೆನ ಚುಡತೆ

ಪೆತ್ತವ್ವನ ಕುತ್ತ ಪರೆಯತೆ

ಪತ್ತ್ ತಿಂಗ ಪೊರ್‌ತ್ ಪೆತ್ತ ತಡಿ ನೊಂದಕ

ಎದೆಲ್ ತಿತ್ತ ಕಾರುವ ಜೋಕೆ

ಚತ್ ಮಣ್ಣಾನ ಆ ತಡಿಕ್

ಚುತ್ ಕೂಳೆನ್ನಂಗ್ ಬೆಪ್ಪಿಯಾ

ಚತ್ತವಂಡ ಪೆದತ್ ಚೋತವಂಗ್

ಧರ್ಮ ಮಾಡ್.



## ವಾತಾಪಿ ಗಣಪತಿ - ಭಕ್ತಿ ಪಾಟ್.

ಬೋಡಿವಿ ನಾ ನಿನ್ನ ಆನೆ ಮೂಡ್ ಗಣಪ  
ಬೋಡ್‌ನ ಈ ತಡಿಕ್ ಸುಖ ತಾರೋ ಗಣಪ  
ಪಾಡುವಿ ನಾ ನೀಡ ಕೇಳಿನಾ ಗಣಪ  
ಪಾಟ್‌ರ ತಾಳಕ್ ಆಡಿ ಬಾ ಗಣಪ.

ಈಶಂಡ ಮೋಂವನೇ ಗಜಮುಖಿ ಗಣಪ  
ವೇಷತ್ ನೀ ಕೂಡ ತಡಿಬಲ್ಯ ಗಣಪ  
ರೋಷ ನೀಕುಂಡ್ ಆದಿಯಾಯಿ ಗಣಪ  
ಪಾಶ ಬುಡತೇ ನೀ ಕಾಪಾಡ್ ಗಣಪ

ಮೊರತಗಲ ಕೆಮಿ ನೀಡ ಮಧಗಜ ಗಣಪ  
ಮೂಷಿಕಂಡ ಬೆನ್ನಳತ್ತ ವಾತಾಪಿ ಗಣಪ  
ಕೈಲಾಸತೂ ನೀಕುಂಡ್ ಆದ್ಯಪೂಜೆ ಗಣಪ  
ದ್ವೇಷ ನೀ ಬರಿಕ್ಟ್ ಕಾಪಾಡ್ ಗಣಪ.

ಬೋಡುವಿ ನಾನಿನ್ನ ಆನೆ ಮೂಡ್ ಗಣಪ  
ಬೋಡ್‌ನ ಈ ತಡಿಕ್ ಸುಖತಾರೋ ಗಣಪ  
ಪಾಡುವಿ ನಾನೀಡ ಕೇಳಿನ ಗಣಪ  
ಪಾಟ್‌ರ ತಾಳಕ್ ಆಡಿಬಾ ಗಣಪ.

\* \* \* \* \*

# ಗೆಜ್ಜೆ ತಂಡ್ (ಪಾಟ್)

ಗೆಜ್ಜೆ ತಂಡ್ ಗೆಜ್ಜೆತಂಡ್  
ಗಿಲಿ, ಗಿಲಿ, ಗಿಲಿ ಗೆಜ್ಜೆತಂಡ್  
ಗೆಜ್ಜೆ ತಂಡ್ ಗೆಜ್ಜೆತಂಡ್  
ಅಜ್ಜಪ್ಪಂಡ ಗೆಜ್ಜೆತಂಡ್  
ಅಂದ್ ಕಾಲಕ್ ಪೊಂಬಣ ಕೆಟ್ಟಿತ್  
ಪೊಣ್ಣ್ ಕೊಂಡಬಂದ ಗೆಜ್ಜೆತಂಡ್

ಆ ಬಂಬ ಕಲ್ಯಾಟಜ್ಜಪ್ಪ  
ಕುತ್ತಿ ನಡಂದ ಗೆಜ್ಜೆತಂಡ್  
ಆ ಶೂರ ಅಪ್ಪಜ್ಜಿ ಮುಂದಣ್ಣ  
ನೇತಿ ನಡಂದ ಗೆಜ್ಜೆತಂಡ್  
ಗೆಜ್ಜೆ ತಂಡ್ ಗೆಜ್ಜೆತಂಡ್  
ಅಜ್ಜಪ್ಪಂಡ ಗೆಜ್ಜೆತಂಡ್

ಕರಿಮರಕುಂಡ್ ಬೊಳ್ಳಿರ ಕೆಟ್ಟ್  
ಬೊಳ್ಳಿರ ಕೆಟ್ಟ್ ಗೆಜ್ಜೆ ಮುರುವೂ  
ಗೆಜ್ಜೆ ಗಿಲಿ ಗಿಲಿ ಗೆಜ್ಜೆ ಮುರುವೂ  
ತಂಡ್ ತಕ್ಕಾರ ಗೆಜ್ಜೆ ಮುರುವೂ

ಚಿಂಗಾರಕೊತ್ತೂರ್ ಗೆಜ್ಜೆತಂಡ್  
ಕಾರೊಣಂಡ ಗೆಜ್ಜೆತಂಡ್  
ಆಯಿಮೆ ಕೊಯಿಮೆ ಕೊತ್ತ ತಂಡ್  
ಕೇಳಿಪೋನ ಗೆಜ್ಜೆತಂಡ್  
ಕೊಡವಡ ಈ ಗೆಜ್ಜೆತಂಡ್.

\* \* \* \* \*



# ತೆರೆ ಆಡ್‌ಚಿ

(ಹರಿಕುಣಿದಾ ರಾಗ)

ತೆರೆ ಆಡ್‌ಚಿ ನಾಡ ತೆರೆ ಆಡ್‌ಚಿ

ಕುಟ್ಟನ ಕೊಡಿಯಲೆ ಬಟ್ಟಲಡಿಕೆಯೆ

ಬಾಯಿಲ್‌ಟ್ಟಂಡ್ ತೆರೆ ಆಡ್‌ಚಿ.

ಗೆಜ್ಜೆತಂಡಾಯಿತ್ ಗಗ್ಗರ ಕೊಯಿತಂಡ್

ಬಗ್ಗಿ ಬಗ್ಗಿಯಂಡೇ ತೆರೆ ಆಡ್‌ಚಿ

ತಾಡಿಯೂ ಮೀಸೆಯೂ ತೇಡಿ ಎಡ್‌ತಂಡ್

ಓಡಿ ಓಡಿಯಂಡೇ ತೆರೆ ಆಡ್‌ಚಿ.

ಒಡ್ಡೊಣಿ ಕಡಂದಿತ್ ಓಡೆಯು ದಾಟಿತ್

ಕೈಮಡ ಪತ್ಯಂಡ ತೆರೆ ಆಡ್‌ಚಿ.

ವಡ್ಡನೊ ಬೊಡನೊ ಚೋಟುನೊ, ಮೋಟುನೊ

ಸುತ್ತಲೂ ಕೂಟಿಯಂಡ್ ತೆರೆ ಆಡ್‌ಚಿ.

ಕಳ್ಳು ಕರಿಯು ಬೊಳ್ಳನೆ ಬೊಳ್ಳಂಡ್

ಜಿಲ್ಲ ಜಿಲ್ಲಾಯಂಡ್ ತೆರೆ ಆಡ್‌ಚಿ.

ನಾಡ್‌ಲ್ ಕೊಡವಾಮೆ ನೆಲೆಯಾಯಿನಿಪ್ಪಕ್

ನಾಡ್‌ನೇ ಕೂಟಿಯಂಡ್ ತೆರೆ ಆಡ್‌ಚಿ.

\* \* \* \* \*

# ನೀ ದಾರೋ?

(ಜಾನಪದ ಶೈಲಿರ ಪಾಟ್)

ಪೂಮಾಲೆ ಮಂದಲ್ ಕೋಲ್ ಪೊಯ್ವಕ  
ಕಾಲ್ ನೇಟಿ ಅಳ್ವ ನೀದಾರೋ?

ಆಲಮರತ್ತಡಿ ಕಾತ್ಲಳತ್ತಂಡ್  
ಬೇರಾಟ್ ಪೋನವ ನೀದಾರೋ?  
ಪೂಮಾಲೆ .....

ಮಾರುದ್ದ ಆ ಜಡೆಯೊ ಕೇರಬಿರ್ಚ್ಚನೆಕೆ,  
ಆಳುದ್ದ ಕಾಂಬಲ್ಲ ನೀ ದಾರೋ?

ಕಂಬಿಪೊಡೆಯಕೊತ್ತ ಚೆಂಬುಡ ಜಾಕೀಟ್  
ಕುಂಬುಟ್ಟಳತ್ತವ ನೀದಾರೋ?  
ಪೂಮಾಲೆ.....

ಕೈದುಂಬ ಬಳೆ ನೀಡ ಗಿಲಿಗಿಲಿದೆಂಣ್ವಲ್ಲ  
ಕಾಮೊಯಿರ ಎಲುಂಗುವಲ್ಲ ನೀ ದಾರೋ

ಮುತ್ತಾನ ಆ ಮೂಡ್ ಕತ್ತಿತ್ತಲಂಗುವಲ್ಲ  
ಸೊತ್ತುಳ್ಳ ಪೊಂಗಳೇ ನೀದಾರೋ?  
ಪೂಮಾಲೆ .....

ನೆತ್ತಿಲ್ ಕುಂಕುಮ ಚಿತ್ತಾಗತುಂಡಲ್ಲ  
ಗೊತ್ತುಳ್ಳ ಪೊಂಗಳೇ ನೀದಾರೋ

ಬಿತ್ತ್ ಬೊಳೆಕ್ಕಾಪ ಗತ್ತುಳ್ಳ ಆತ ಡಿಯೊ  
ಗೊತ್ತಾಯಂಡಿಲ್ಲ ನೀದಾರೋ?  
ಪೂಮಾಲೆ .....

ಮಂಡೆಕೊಸ್ ಕೆಟ್ಟಿ ದುಂಡ್ ತಿರಿಕಿಯಂಡ್  
ಪುಂಡಾಟಕಿಲ್ಲತ್ತವ ನೀದಾರೋ

ಚೆಂಡ್ತೂರೆ ಕೋಲ್ ಪೊಯ್ಯುವ ಬಾಲರ  
ಕಂಡ್ ಕೊದಿಪವ ನೀದಾರೋ.

\* \* \* \* \*

# ಮಮ್ಮ ಮೂಡಿ

“ಲಾಲಲಾಲ ಲಾಲಲಾ” “ಲಾಲಾ ಲಾಲ ಲಾಲಲಾ”  
ಮಾವಂಡ ಮೋವಳ ಕಾಂಗೊಂಡು  
ಪುತ್ತರಿ ಚತ್ತೇಕ್ ಪೋಕಂಡು  
ಆಳ್ ಸಿರೆ ಸಿರೆ ನೋಟಂಡು  
ಬಾಳ್ ಬದ್‌ಕ್‌ನ ಕೇಕಂಡು  
ತಾರಾರತ್ತರ ತಾರರೆ ತಾರಾರತ್ತರ ತಾರರೇ . . . . (3)

ಬಟ್ಟಿಯೂ ಪೊಟ್ಟಿಯೂ ನಾಕಾಂಡು  
ಬೊಟ್ಟಪೊಡಿಯ ಅವಕ್ಕಾಂಡು  
ಕುಪ್ಪಿಯು ಚೇಲೆಯು ನಾಕಾಂಡು  
ಮಾಲ್ ಮಠಶೀರ ಅವಕ್ಕಾಂಡು  
ಮಾವಂಡ ಮೋವಳ .....

ತಾರಾರತ್ತರ ತಾರರೆ ತಾರಾರತ್ತರ ತಾರರೇ . . . . (3)

ಕಾಲೇಜ್‌ಕ್ಕಾರಿ ಮಮ್ಮಮೂಡಿ  
ಮ್ಯಾರೇಜ್‌ಕೊತ್ತೋರ್ ಕನ್ನಿಮೂಡಿ  
ಸ್ಮಾಲೇಜ್ ಎಕ್ಕಲೂ ನೀಕ್ ಮೂಡಿ  
ಕಾಲೇಜ್ ಲೈಫೇ ಚಾಯಿಮೂಡಿ  
ಮಾವಂಡ ಮೋವಳ .....

ತಾರಾರತ್ತರೆ ತಾರರೆ ತಾರಾರತ್ತರ ತಾರರೇ . . . . (3)

ಮಿಯಾಂ, ಮಿಯಾಂ ಮಮ್ಮಮೂಡಿ  
ಪೂಂಇ ಕಣ್ಣ್ ನೀಡ ಚಾಯಿ ಮೂಡಿ  
ಬೋಜಿ ಮಾಂವಂಡ ಗಾಜಿ ಮೂಡಿ  
ಈ ಬೋಜಕ್ಕಾರನ ಕೂಡ್‌ಮೂಡಿ  
ತಾರಾರತ್ತರ ತಾರರೆ ತಾರಾರತ್ತರ ತಾರರೇ . . . . (3)

\* \* \* \* \*



## ನೇರ್ ಪರಿಪವ

ಯಾಕತೆವ ಮಧ್ಯತ್ಯೋ.....? ಶೋಕತ್ ನಿಂದವಳೇ.....?  
 ಬಾಕ್‌ಕೆನ್ನ ಬರಬಂದಿತ್ತೋ ..... ಬಾಯಿಕೆನ್ನ ಬಡಾಯಿಯೋ?.....  
 ತನ್ನನತ್ತನ ತಾನತನ್ನಾನ ತನ್ನನತ್ತನ ತಾನತನ್ನನ .... 2

ಯಾಕತೆವ ಮಧ್ಯತ್ ನಿಂದಂಡ್ ನೇರ್ ಪರಿಪವಳೇ  
 ನೀಡ ನೇರ್ ಪುಡಿರ ಜಾಯಿನ ಕಂಡಿತ್  
 ಪಾರಿ ಪಾರಿ ಬಂದನೆ.

ತನ್ನನತ್ತನ ತಾನತನ್ನಾನ ತನ್ನನತ್ತನ ತಾನತನ್ನನ .... 2  
 ನೇರ್ ಗುಡ್ಡೆರ ಸಾಲ್ ಸೋಟದ್ ಬಾಲ್ ಬಿರ್‌ಚನ್ನಕೆ  
 ಹನುಮಂತಂಡ ಬಾಲ್ ಬಿರ್‌ಚನ್ನಕೆ.

ಗುಡ್ಡೆಕೂಟ್‌ನ ಬೋಜ ಸೋಟದ್ ಕೋಲ ಬರಂದನ್ನಕೆ  
 ರಂಗೋಲೆ ಕೋಲ ಬರಂದನ್ನಕೆ

ಯಾಕತೆವ . . . .? . . . .

ತನ್ನನತ್ತನ . . . .

ಓರ್‌ಪುಡಿ ಮೂಂದ್ ಕೈಪುಡಿಯಾಕು

ನಡ್ವೊಂವೊ ನಂದಾಕು

ಆಂಡನೆರಕ್ಕಾರ ಚಿಂಡುಳಿ ಬಾವಂಡ

ಮಂಡೆ ತಿರಿಪೋಕು

ಯಾಕತೆವ . . . .? . . . .

ತನ್ನನತ್ತನ . . . . .

ದಮ್ಮಯ್ಯ ಪೊಂಗಳೆ ಒಮ್ಮಕೆ ನಿನ್ನಡ

ಬೋಜಿ ಮೂಡ್ ಕಾಟ್

ಬೋಜಿಮೂಡ್‌ಕಂಡ ಬೋಜಕಾರಂಗಿಂದ್

ಸೋಜಿಗ ತೇ ಪಾಟ್

ಯಾಕತೆವ . . . .? . . . . .

ಬೇಜಾರ್ ಬೊಂಡಲ ನೀಕೂ ನಾಕೂ

ಸಮ್ಮಂದ ಕೂಡಿಬಾತ್

ಬೋಜಕಾರಿ ನೀಡ ಬಾಕೆ ಕೂಡುವೇಂಗಿ

ಸಮ್ಮಂದ ನೀ ಕಾಟ್

ತನ್ನನತ್ತನ . . . . .

\* \* \* \* \*

## ಜಮ್ಮಕಾರಿ

ನಮ್ಮೆಕ್ ಪೊರಟ್ ನಿಂದ ಜಮ್ಮಕಾರಿಯೆ,  
ನೀಡ ದಿಮ್ಮಿತಕ, ದಿಮ್ಮಿತಕ ತುಳ್ಳಿಕಳಿಯೆ,  
ಅಮ್ಮೆ ಓ ತಾಯಿ ನನ್ನ ಒಮ್ಮೆ ಕಾಪಾಡ್  
ಇವಡ ಚಾಯಿ ಬೋಜ ಕಂಡ ನಾಕ್  
ಎನ್ನಂಗೀ ಪಾಟ್

ತಂದನಾ ತಂದನಾನ ತಂದನ ನಾನ . . . . . 2

ಇವ ಪೊವ್ವದಿರ ನಮ್ಮೆಕ್ ಪೊರಟ್ ನಿಂದವ  
ಬೈತಲೆನ ಬಾತಿಬಲಚಿ

ಜೆಡೆ ಇಟ್ಚ್ಚೆ ಬಂದವ

ಅಡ್ಡಿಗೇ, ಕೊಕ್ಕಿತಾತಿ ಕೊಯಿತ್ ನಿಂದವ

ಅಯ್ಯೊ ಕೊಡವ ಕನ್ನೆ ನೀನೇಂದ್

ಕೊದಿಪ ಈ ನಾಡ ಜೀವ

ನಮ್ಮೆಕ್ ಪೊರಟ್ನಿಂದ ಜಮ್ಮಕಾರಿಯೆ

ನೀಡ ದಿಮ್ಮಿತಕ ದಿಮ್ಮಿತಕ

ತುಳ್ಳಿಕಳಿಯೆ . . . . .

ತಂದನಾ ತಂದನಾನ ತಂದನ ನಾನ . . . . . 2

ದೇವ ಪೊರಮೆ ಬಂದ ನೇರ ಅಲ್ಲಿ ಕೊಂಡಾಟ

ಇವಡ ಮಿಂಇನೆ ನಿಂದ ನಾಕ್ ಇಲ್ಲಿ ಬಂಡಾಟ

ನಮ್ಮೆಕ್ ಬಂದವು ಮಾಡುವಲ್ಲಾ ಪುಂಡಾಟ

ಇವಡ ಚಾಯಿಕಂಡ ನಾಕ್ ಇಕ್ಕ ಪರದಾಟ

ತಂದನಾ ತಂದನಾನ ತಂದನ ನಾನ . . . . . 2

ಪಕ್ಕ ನಿಂದ್ ಒಮ್ಮೆ ಆ ಪೊವ್ವದಿನ ಬೊಡುವಿ

ದಿಕ್ಕ ತೋಚತೆ ಅವಕ್ ಅಡ್ಡ ಬೂವಿ

ಇವ ದಕ್ಕುವೇಂಗಿ ದೇವಿಕ್ ಉರುಳುಸೇವೆ ಮಾಡುವಿ

ನಾಡ ಒಕ್ಕಡ ನಲ್ಲಮೆಕ್ಕಾಯಿತ್ ಇವಳ ಕೂಡುವಿ

ತಂದನಾ ತಂದನಾನ ತಂದನ ನಾನ . . . . . 2

# ಲೇಲಾಲೇ ಪಾಟ್

ಲೇಲಾಲೇ ಲಾಲೇಲ

ಲೇಲಾಲೆ ಲಾಲೇಲ ಲೇ ಲೇ ಲೋ ಲೇಲೋ

ಲೇಲಾಲೆ ಪಾಟ್‌ನ ಪಾಡುವಿ ನಾನ್

ಪತ್ರಿಕೆ ಓದುಗರೆಲ್ಲಾರು ಕೇಳಿ

ತಪ್ಪೇದು ಉಂಡೇಂಗಿ ಎನ್ನಡ ಪಾಟ್

ತಪ್ಪಾಕ್ ಒಪ್ಪುಟ್ಟ್ ತಿದ್ಯೋಳಿ ನಿಂಗ.

ಲೇಲಾಲೆ . . . . . ಲೇಲೋ.

ಪಂಡೆತ್ ಕಾಲತ್ ನಡಪ್‌ರ ಚಾಯಿ

ಇಂದಿಕ್ಕ ಕಾಂಬುಲೆ ಅನ್ನತ ಚಾಯಿ

ನಡಪೆಲ್ಲಾ ಪಂಡಿಯ ಕಾಲತೇ ಪೋಚಿ

ಅಜ್ಜಂಗ ಚಾವಕ ಅನ್ನನೇ ಪೋಚಿ

ಲೇಲಾಲೆ . . . . . ಲೇಲೋ.

ಅಂದಿಜ ಪುತ್ತರಿ ಪನ್ನಂದ್ ನಾಳ್

ಇಂದುಳ್ಳ ಪುತ್ತರಿ ಒಂದರೆ ನಾಳ್

ಮಂದ್‌ಕೂ ಕೂಡುಲೆ ಮನೆಪಾಟ್ ಇಲ್ಲೆ

ದಮ್ಮಯ್ಯಂದೇಣ್ಣವಿ ಇಂಚೊಮ್ಮ ಕೇಳಿ

ಮಂಗಲಂದೇಣ್ಣಕ ಮಂಗಳ ಕಾರ್ಯ

ಆಚೇಂಗಿ ಇಂದಿಕ್ಕ ಮಕ್ಕಡ ಕಾಲ

ಮುಕ್ಕಾಲ್ ಸುರಾಲ್ ಮಂಗಲ ಆಪ

ಚಪ್ಪರ ತೊಪ್ಪಿಲೆ ಅನ್ನನೇ ಆಪ

ಪೊಮ್ಮಕ್ಕ ಪೊರಡುವೊ ಇಂಇಲೂ ಕೇಳಿ

ಬೊಟ್ಟ್ ಪೊಡೆಯವು ಇಂದಿಲ್ಲೆ ಕೇಳಿ

ಜುಮುಕ್ಕಿ ಚವುಕ ಇಂಇಕ್ಕ ಕೇಳಿ

ಇಂದಿಯ ಪೊರಪಾಡ್ ಕಾಂಬಕ ನಾಕ್

ಕುಳಿಯಮೆ ಚವುಂಡಿಯಮೆ ಕಣ್ಣಾರೆ ಕಾಂಬ

ಚೆಡಿಯತಿ, ತೊಡಿಯತಿ ಓದುಗ ನಿಂಗ

ಕಣ್ಣಾರೆ ಕಂಡಾನ ಪಾಡಿಯೇ ನಾನ್

ನಡಪುನ ಉಡುಪುನ ಮರೆಯತಿ ನಿಂಗ

ಕಾವೇರಮ್ಮನ ತೊರೆಯತಿ ನಿಂಗ

ಲೇಲಾಲೆ . . . . . ಲೇಲೋ.



## ಹೇ ಮನಾಷ

ಹೇ. . . . ಮನಾಷ ಮನುಕುಲಕ್ ನೀನೇ ಅವಶ್ಯ  
ನೀ ನೀಡ ಜಸ್ಮತ್ ಮಾಡ್ ನಲ್ಲ ನಲ್ಲ ಕರ್ಮ  
ಈ ಭೂಮಿಲ್ ನೀ ಮಾಡ್ ಧರ್ಮ  
ಕೈ ಇಡತೆ ನೀ ಎಂದೂ ಅಧರ್ಮ.

ನೀಕಿರಡ್ ನೂರ್ ಕಾಲ ಆಯಸ್ಸು  
ನೀಡ ಮೇಲ್ಡೀ ದುಂಬಿಯಂಡುಂಡ್ ವಿಷ  
ಅದಾಂಗ್ ನೀಕ್ ಬೆರಿಯ ಬಪ್ಪ ಆವೇಷ  
ಉತ್ತ ನೀಡ ಈ ಕಳ್ಳ ವೇಷ  
ಕತ್ತ ನೀಡ ಎದರೊಳ್ಳುಳ್ಳ ಕಿಚ್ಚಿ, ಕೊಳೆ, ದ್ವೇಷ  
ನೀ ಎತ್ತ ನಲ್ಲ ನಲ್ಲ ಕಾರ್ಬಾರ್ ಉದ್ದಿಶ್ಯ  
ಬಿತ್ತ ನಲ್ಲ ನಲ್ಲ ತೇನ್ ಮೊಳಿರ ಘೋಷ  
ಪತ್ತ ಅಡಿ ಇಟ್ಟ್ ಸ್ವರ್ಗಂದೆಣ್ಣುವ ಆಕಾಶ  
ಎತ್ತ ಶ್ರೀ ನಾರಾಯಣ ದೇವಂಡ ವಿಳಾಸ  
ಹೇ ಮನಾಷ ಮನುಕುಲ ನೀನೇ ದುಂಬ ಅವಶ್ಯ

\* \* \* \* \*

## ನಾಕಂಡ ಕೆಟ್ಟ ಸ್ವಪ್ನ

ಈ ಕೊಡಗ್ ನಾಡೇ ಒರ್ ಪಚ್ಚೆ ಬಸ ಕಾಡ್  
ಇಲ್ಲಿಯೂ ಉಂಡ್ ಫಲತರ ಜಾತಿ ಜನತರ ಗೂಡ್  
ಎಲ್ಲಿ ನೋಟ್ ಚಿಂಗಿಯೂ ಕುಂದ್ ಕಾಡ್ ಮೋಡ್.  
ಇಂಚೆನ್ನಂಗ್ ಈ ಜನಡ ಎದರೊಳ್ಳು ಕಿಚ್ಚಿ ಕೇಡ್?  
ಒಬ್ಬನೇ ಬದ್ಕೊಂಡು ಒಬ್ಬನೇ ಚಾವಂಡು  
ತಾನೊಬ್ಬನೇ ಈ ಮಣ್ಣಿನ ಇಡೀ ಆಳೊಂಡು  
ಇದೇ ಈ ಜನಡ ಹೊಟ್ಟೆಕಿಚ್ಚಿರ ದುರಾಸೆ  
ಕಾಡೆಲ್ಲಾ ನಾಡಾಂಡು, ಬೇಲ್, ಬಾಣ್ ಕೆರೆ ಅಂಡು  
ನಾಡೆಲ್ಲಾ ನಾಕೂ ನನ್ನಾಡ್ ಮಕ್ಕಕೂ ಇರೊಂಡು  
ನಾ ಚತ್ತ ಪಿಂಚ್ ಈ ಮಣ್ಣೆಲೇ ಇಡೊಂಡು  
ಇದೇ ನಾ ಕಂಡ ಕೆಟ್ಟ ಸ್ವಪ್ನ.

\* \* \* \* \*

# ಪಜ್ಜಿರ ಗೌಜಿ

ಕರವಟ್ಟಿ, ಮೂಂದೊಟ್ಟಿ ಮುದರೆ ಪಜ್ಜಿ  
ಚಿರೋಟಿ ಓರೋಟ್ಟಿ ಚಕ್ಕೆಕುರುಪಜ್ಜಿ  
ಕೈಪೇಟಿ ಕಾಟಿತಕ್ಕು ಕೈಪುಳಿ ಪಜ್ಜಿ  
ಕಂಡವು ಎಲ್ಲಾ ತಿಂದ್ ತೀಕು ಕೈಪುಳಿ ಪಜ್ಜಿ  
ಕಂಜಿತಂಡಲ್ಲಿ ಮಿಂಜಿತಿಕ್ಕು ಇಂಜಿ ಪಜ್ಜಿ  
ಎಂಜಿಯಾ ಚೆಂಗಿಯೂ ತಿಂದ್ ನೋಟಿ ಇಂಜಿಪಜ್ಜಿ  
ಕೊಂಗಾಂಡ ಒಕ್ಕಡ ತೆಂಗೆಪಜ್ಜಿ  
ಕೋಳಿ ಕೂತ್ ಕ್ ಕಟ್ಟು ನೋಟಿ ತೆಂಗೆಪಜ್ಜಿ  
ಮಾಳೇಟಿರಲ್ಲಿ ಒಮ್ಮ ಮಾಂಗೆ ಪಜ್ಜಿ  
ಮರಂದಕೊ ಮರಪುಲೆ ಮಾಂಗೆಪಜ್ಜಿ  
ಮೇಕೇರಿರಯಿಂಗಡ ಮೀನ್ ಪಜ್ಜಿ  
ಕೂಳ್ ಮೇಕಿ ತಿಂಬ ನೋಟಿ ಮೀನ್ ಪಜ್ಜಿ  
ಕುಳಯಕಂಡಲ್ಲಿ ಅಂದ್ ಪುಳಂಜೆ ಪಜ್ಜಿ  
ಕುಪ್ಪಿಂಗಳ್ಳಿ ಮಿಂಇ ಬೆಚ್ಚಿ ತಿಂಬ ಪಜ್ಜಿ  
ಮಾತಂಡಲ್ಲಿ ಎಕ್ಕಲೂ ಮಳು ಪಜ್ಜಿ  
ಕಾರ ಕಾರ ಇಕ್ಕುಲ ಮಳು ಪಜ್ಜಿ  
ಮುಂಡಂಡಯಿಂಗಡ ಕಂಡೆ ಪಜ್ಜಿ  
ತೊಂಡೆಕತ್ತಣೆ ಅವು ತಿಂಬ ಕಂಡೆ ಪಜ್ಜಿ  
ಬೆಲ್ಲತಂಡಲ್ಲಿ ಅಂದ್ ಬೆಲ್ಲ ಪಜ್ಜಿ  
ಬೇಜಾರಾಯಿತಿಪ್ಪಕ ತಿಂಬ ಪಜ್ಜಿ  
ಬೊಳಕ್ಕಾರಂಡೊಕ್ಕಡ ಬೇಳೆ ಪಜ್ಜಿ  
ಬೊಳ್ ಬೊಳ್ತ್ ಕಾಂಬಲ ಬೇಳೆ ಪಜ್ಜಿ  
ಕಟ್ಟೆರ ಮನೆಲಂದ್ ಕಡಲೆ ಪಜ್ಜಿ  
ಕಟ್ಟೆ ಕಟ್ಟೆ ಇಂಜತ್ಲೊ ಕಡಲೆ ಪಜ್ಜಿ  
ಅಲ್ಲಾರಂಡ ಮನೆಲ್ ಎಳ್ಳ ಪಜ್ಜಿ  
ಎಲ್ಲಾರೂ ಮಾಡಿನೋಟಿ ಎಳ್ಳ ಪಜ್ಜಿ  
ಈಂಡ ಕೂಟ್ ಕ್ ಈರುಳ್ಳಿ ಪಜ್ಜಿ.  
ಇಕ್ಕ ನೋಟಿ ಅದ್ ಪಿಪ್ಪ  
ಚೋದ್ ರಗೌಜಿ

\* \* \* \* \*

# ಬಕಾಸುರ ಬಂಡೆಕಲ್ಲ್

(1998ಲ್ ನಡಂದ ಸತ್ಯ ಘಟನೆ)

ವೀರ್ರಾಜ ಪೇಟೆರ ಮಲತಿರಿಕೆ ಕುಂದಲ್  
ಬಲ್ಯೋರ್ ಬಂಡೆರ ಕಲ್ಲಿಂಜತ್  
ಬಂಡೆ ಬಕಾಸುರ ರಾಕ್ಷಸಂಡ ಮಾದರಿ  
ಪೇಟೆಕ್ ಕುತ್ನೋರ್ ನೋಟುವಯಿಂಜತ್  
ಆ ಆಂಡ್ ಮಳೆಕಾಲ ತಾಂಗಿತ್ ಪೊಜ್ಜಾಂಗ್  
ಬಂಡೆರ ಬೇರೆಲ್ಲಾ ಬುಟ್ಟ್ ಪೋಚಿ  
ಆ ಬಂಡೆ ಅಳತಿತಿಂಜ ಮಣ್ಣೆಲ್ಲಾ ಮಳೆಪೊಜ್ಜಿ  
ಅಲ್ಂಜಿತ್ ನೀರಾಯಿ ಒಕ್ಕಿಪೋಚಿ  
ಬಂಡೆಕ್ ಚಾಯೋಡೆ ನಿಪ್ಪಕ್ ಕಯ್ಯತೆ  
ಕೇದಕ್ ಜೂಂಗಿಯಂಡ್ ನಿಪ್ಪಕಾಚಿ.  
ತಾನಿಕ್ಕ ಬೂವಿನೊ ಇಂಚಿಕ್ಕ ಬೂವೀಂದ್  
ಎಣ್ಣೆತ್ ಬಂಡೆಕ್ ಮನಸ್ಸು ಪೋಚಿ  
ಇದ್ಕಂಡ ಮಾಜನ ಬಂಡೆರ ಮೀದತ್  
ನಂಬಿಕೆ ಕಳಂದಂಡ್ ನಡಪಕ್ಕಾಚಿ  
ಕಾರ್ ಬಸ್ಸು ಎಲ್ಲಾ ಬಂಡೆರ ಪೋಡಿಕ್  
ಆ ಜಾಗ ರಸ್ತೆಲ್ ಬರತೇ ಪೋಚಿ  
ಪೇಟೆಕ್ ಬಂದವು ಬಂಡೆನ ನೋಟಿಯಂಡ್  
ಬೇರ್‌ಟ್ ಅಲ್ಲಿಯೇ ನಿಪ್ಪಕ್ಕಾಚಿ  
ನಾಡ್‌ರ ಜನ ಎಲ್ಲಾ ಬಂಡೆರ ವಿಷಯತ್  
ಮಂಡೆ ಕೆಡತಿಯಂಡ್ ನಡಪಕಾಚಿ  
ರಿಮೋಟ್ ಕಂಟ್ರೋಲ್ ಕಂಪ್ಯೂಟರಿಂಜಿತೂ  
ಆ ಬಂಡೆ ಈಂಗೆಲ್ಲಾ ಬೊತ್ತತ್ತಾಚಿ  
ಬಂಡೆರ ಕೀದತ ಮನೆಕಾರ ಎಲ್ಲಾರೂ  
ಮನೆಬುಟ್ಟ್ ದೂರಕ್ ಓಡಿಪೋಚಿ  
ಕಲ್ಲೂ ಮಣ್ಣೂ ದಾರೂಕು ಬೊತ್ತುಲೆ  
ಆಂಗ್ಲೇಂದೇ ಪುಟ್ಟೆನ ಜೀವ ಒಂದುಂಡು  
ಒಡ್ಡಡ ತಿಮ್ಮಣ್ಣ ಬೊಡ್ಡನಾಚೆಂಗಿಯೂ  
ಕಲ್ಲಕ್ ಮಣ್ಣಕ್ ಬೊತ್ತತಂವೊ  
ವಡ್ಡನ ಕಾಂಬಕ ಆ ಬಂಡೆ ಕಲ್ಲಕ್  
ಮಾರ ಪನಿಯೊಂದ್ ಬಂದೇಪೋಚಿ  
ಬುಟ್ಟತ್ ಕಲ್ಲರ ಉಟ್ಟಿಮಂಡೆಕಂವೊ  
ವಡ್ಡಂಡ ಪೊಯಿತ್ ಕಲ್ಲೊಡಂದತ್  
ವಡ್ಡಂಡ ಪೊಯಿತ್ ಕಲ್ಲೊಡಂದ ಆ ದಿನ  
ನಾಡ್‌ರ ಜನತೆರ ಕಣ್ಣ್ ತೊರ್ಂದತ್

# ಚಿಂಗಾರ ಪಾಟ್

(ಬಾಳೋಪಾಟ್ ರಾಗ)

ಚಿಂಗಾರ ಬಂಗಾರ ಎನ್ನಂದ್ ಕೇಳ್  
ಚಿಂಗಾರ ಪಾಟ್‌ನ ಚಾಯೋಡೆ ಕೇಳ್  
ಮೋಣ್ಣೆಕ್ ಚಿಂಗಾರ ನೆತ್ತಿಲ್ ಬೊಟ್ಟ್  
ಆಣ್‌ಕ್ ಚಿಂಗಾರ ಕೊಂಬಮೀಸೆಯೊ  
ಚಿಂಗಾರ . . . . .

ಮೊಟ್ಟೆಕ್ ಚಿಂಗಾರ ಬೊಟ್ಟ್ ಪೊಡಿಯ  
ಕೊಟ್ಟೆಕ್ ಚಿಂಗಾರ ಪಟ್ಟತಿ ಪಯ್ಯು  
ಓಣಿಕ್ ಚಿಂಗಾರ ಓಣಿ ತೆರಮೆ  
ಬಾಣೆಕ್ ಚಿಂಗಾರ ಬಾಣೆ ತೆರಮೆ  
ಚಿಂಗಾರ . . . . .

ಬಾಡೆಕ್ ಚಿಂಗಾರ ತೂಕ್ ಬೊಳ್‌ಕ್  
ಗೋಡೆಕ್ ಚಿಂಗಾರ ಒಡಿಕತ್ತಿ ತೋಕ್  
ಕೋಡಂಗ್ ಚಿಂಗಾರ ಮಾರುದ್ದ ಬಾಲ್  
ಕೊರಮಂಗ್ ಚಿಂಗಾರ ಕೈಯ್ಯಿಲ್ ಕೋಲ್  
ಚಿಂಗಾರ . . . . .

ಪಟ್ಟಂಗ್ ಚಿಂಗಾರ ಮಂಡೆಕ್ ಜುಟ್ಟ್  
ಮೋಟಂಗ್ ಚಿಂಗಾರ ಮೂಳೆಕ್ ಚೆಡ್ಡಿ  
ಪಾಟ್‌ಕ್ ಚಿಂಗಾರ ಲೇಲೊಳಿ ಪಾಟ್  
ಆಟ್‌ಕ್ ಚಿಂಗಾರ ಉಮ್ಮತ್ ಆಟ್  
ಚಿಂಗಾರ ಬಂಗಾರ ಚಾಯುಳ್ಳ ಪಾಟ್  
ಚಿಂಗಾರ ಪಾಟ್‌ನ ಚಾಯೋಡೆ ಕೇಳಿ.

\* \* \* \* \*



# ಅಮ್ಮಾ

ಅಮ್ಮಾಂದೆಣ್ಣುವೊ ದಂಡಕ್ಕರತ್  
ಅಡಂಗಿತ್ ಎಚ್ಚಕ್ ಕನಿಕರ  
ಜಮ್ಮ ಕೊಡಗರ ಕೊಡವಳೆ  
ಈ ತಕ್ಕನ ಕೇಪಿರಾ?

ಪತ್ತ ತಿಂಗ ಪೊರ್ತ್ ನಡಂದವ  
ಪೆತ್ತ ಚಾಕಿತ್ ಬುದ್ಧಿತಂದವ  
ಕೆತ್ತ ನೀರ್ಕೂ ಬೊತ್ತತ್ತ ಜೀವ  
ಅಮ್ಮಾಂದೆಣ್ಣುವೊ . . . . .

ಮೊರ್ಟ ಸದ್ದಕ್ ಜೀವ ಬುಡುವವ  
ಕುರ್ಟ್ ಚಾಳಿನ ಚುರುಟಿ ಕನಿಪವ  
ಮುತ್ತ ಮುತ್ತನ ತಕ್ಕರ ಆ ಜೀವ  
ಅಮ್ಮಾಂದೆಣ್ಣುವೊ . . . . .

ಎದೆರ ಚೋರೆನ ಪುಂಡಿತಪ್ಪವ,  
ಮೊದರ ಬಾಯಿಲ್ ಮುತ್ತ ತಪ್ಪವ  
ಬಾಳ ಬದ್ಕನ ಪಡ್ಪಚಿಟ್ಟ ತಪ್ಪವ  
ಅಮ್ಮಾಂದೆಣ್ಣುವೊ . . . . .

ಬೋಜಿ ಮೇಲ್ನ ಮಿನಿಕಿ ತಪ್ಪವ  
ಗಾಜಿರೆನ್ನೆಕೆ ಉರುಟಿತಪ್ಪವ  
ಭೂಮಿ ತಾಯಿರ ವರ ಆ ಜೀವ  
ಅಮ್ಮಾಂದೆಣ್ಣುವೊ ದಂಡಕ್ಕರತ್  
ಅಡಂಗಿತ್ ಎಚ್ಚಕ್ ಕನಿಕರ  
ಜಮ್ಮ ಕೊಡಗರ ಕೊಡವಳೆ  
ಈ ತಕ್ಕನ ಕೇಪಿರಾ!

\* \* \* \* \*

## ಬದ್‌ಕ್

ಎಲ್ಲಾ ಮನುಷ್ಯಂಗೂ ಮನ್‌ಷತ್ತ್ ಇಲ್ಲೆ  
ಉಳ್ಳದ್ ಕೆಲವುಕ್ ಮಾತ್ರ  
ಇದ್ ಲೋಕತ್ ನಡಂದಡುಳ್ಳ ಸೂತ್ರ  
ಬಾಯಿಲ್ ಬೆರೀ ಬಳ್ಯಾನ್ ಒಂದೇ ಗಾತ್ರ  
ಹಚ್ಚಾಯಿತಿಪ್ಪ ಈಯಂಡೆದಲ್  
ಕಿಚ್ಚಿರ ಬಣ್ಣತ ಸೂತ್ರ  
ನೋಟುವದಿಲ್ಲೆ ಇವು ಕುಲಗೋತ್ರ  
ಈಯಂಡ ಬದ್‌ಕೇ ಒರ್ ವಿಚಿತ್ರ  
ಪೊಟ್ಟ್ ಪರೆಯುವ ಬಲ್ಯ ಕುಂದ್‌ರ ಗಾತ್ರ  
ಇದೇ ಇಯಂಡ ಬದ್‌ಕ್‌ಲ್  
ಎಕ್ಕಲೂ ಕಾಂಬ ವಿಚಿತ್ರ  
ಅತ್ತ ಮರಿವಕ್ ಕಟ್ಟ್, ಇತ್ತ ಮರಿವಕ ಮೆತ್ತ  
ಎತ್ತ ಪೋರಿಯಕೂ ಕಡೆಕೆಟ್ಟ ಕತ್ತೆ  
ಚುತ್ತೆ ಕೂಳ್‌ಕೂ ಇಲ್ಲಿ ಪರದಾಟ  
ಕೆಲದುಂಬಿತ್ ಕೂಳ್ ಚಾಡುವಯಿಂಡ  
ಬಲ್ಯದೊರ್ ಕೂಟ.  
ಗರಿಬಂಡ ಬದ್‌ಕೇ ಬರಿ ಬೇಜಾರ್  
ಈ ವಿಷಯತ್ ದಾರೂ ಮಂಡೆಕ್  
ಎಡ್‌ಕತದೇ ಬಲ್ಯ ವಿಚಾರ.  
ಅಲ್ಲಿ ಇಲ್ಲಿ ಅಯಿಂಡಯಿಂಡದೇ ಆಚಾರ  
ಇಂಇಕ್ಕೆ ಆಪಕುಂಡೊ  
ಗರೀಬಂಡ ಉದ್ಧಾರ.

\* \* \* \* \*

# ಪೊಣ್ಣಾ ಜನ್ಮ

ಪೊಣ್ಣಾ ಪೆತ್ತ ಅವ್ವಂಗ್ ಪನ್ನಂದ್ ಚಿಂತೆ  
ಜಬ್ಬುಮಿ ಮೀದಲ್ ಎನ್ನೆಲ್ಲಾ ಚರಿತೆ

ಚಾಕಿ ಪೊಲತೊಲು ಚೆಲ್ಲಾಟ ತೀಕೊಲು  
ಚೋತ್ ಚಿಕ್ಕಿತೂ ಚಂದೋಳ ಕಾಂಗೊಲು

ಬಯತೋರ್ ಪದಿನೆಟ್ಟ್ ತಾನಾಯಿ ದುಂಬುವಕ  
ಪೆತ್ತವ್ವಂಡೆದಕ್ಕಂದ್ ತೆಡ್ಬಡ್ಚ ಅನುಭವ

ಇಂದಿಚ್ಚಕ್ ನಾಳೇಡ ಚಾಯೋಡೆ ಕಯಿಂಜತ್  
ಇಂಇಕ್ಕಿ ಚಾಯಿಕೇಡ್ ನಾಕಾಪ ಕಾಂಬಲಾ

ನಾನೆನ್ನ ಮಾಡಡ್ ನಾನೆನ್ನ ಕೆಯ್ಯಡ್  
ನಾಳ್ ನಾಳ್ಕ್ ಅದಿಯಾನ ಚಿಂತೆ

ಮಂಗಲ ಕೈಪೇಂಗಿ ಮಾರುದ್ದ ಚಿಂತೆ  
ಮೋವಕ್ ಚಿಂಗಾರ ಪೊನ್ನ ಪಣ ಆಂಡು

ಚಾಯುಳ್ಳ ಬಾಕೆ ಮನೆ ಕ್ಕೊಂಡು  
ಚಂದೋಳತ್ ಚಾಕುವ ಮೈಮನೂ ತಾ ಬೊಂಡು

ಚುಮ್ಮಿ ಕಾಲತ್ ಜೂಕಿತ್ ಚಾಕಿತ್  
ಪೊಣ್ಣಾಪ ಕಾಲತ್ ಕಂಡಯಿಂಗ್ ಕೊಡುಕೊಂಡು

ಪೊಣ್ಣಾ ಪೆತ್ತವಂಗ್ ಪನ್ನಂದ್ ಚಿಂತೆ  
ಜಬ್ಬುಮಿ ಮೀದಲ್ ಎನ್ನೆಲ್ಲಾ ಚರಿತೆ

\* \* \* \* \*

# ಜೀವನ

ಜೀವನ ಎಣ್ಣುದೋರ್ ಗುಟ್ಟ್  
ಅದ್ ಪಡ್‌ಚವಂಗ್ ಬಾರಿ ಬಲ್ಯ ಬಟ್ಟ್  
ನಾಡ್‌ಡೀ ತಿರುಗುವ ಜನ ಇಟ್ಟಂಡ್ ಕೋಟ್  
ನೇರಾಯಿತೂ ಆಯಿಂಗುಂಡಾ ಇಲ್ಲಿ ಸೀಟ್

ಬಾಳ್ ಬದ್‌ಕ್‌ರೊಳ್ಳೆ ನಡ್‌ಂದಂಡುಂಡ್  
ಬಾರೀ ಪೋರಾಟ  
ಉಳ್ಳವಂಡ ಮನೆಲ್ ಆರಾಟ  
ಕಳ್ಳ ಕದೀಮಂಗಡದೇ ಒರ್ ಕೂಟ

ದೇಶತ್ ಇಂದ್ ನಡ್‌ಂದಂಡುಂಡ್  
ಕೊಲೆ, ಕೊಳ್ಳೆ, ಸುಲಿಗೆ  
ಇದ್‌ನ ಇನ್ನನೆ ಬುಟ್ಟಕ  
ಜನಕ್ ಬಾರಿ ಬಲ್ಯ ಸಲಿಗೆ

ಇಳಿಯನ ಎಲ್ಲಾರೂ ಒಗ್ಗಟ್ಟಾರ ಸಲಿಗೆ  
ಇದೇ ಈ ಯುಗಾಂತ್ಯಕ್ ನಂಗ  
ಲೋಕಕ್ ಕೊಡ್‌ಪ ಕೊಡುಗೆ.

\* \* \* \* \*



# ಅಜ್ಜಂಡ ಬೋಧನೆ

ಎನ್ನಂಗಪ್ಪಾ ಈ ತೆಳಿ ನನ್ನ  
ನೋಟಿಯಂಡೇ ಈ ಕಳಿ  
ಒನ್ನಾಂದ್ ನೀಕೂ ಬಪ್ಪ ಇನ್ನತ ಕಾಲ

ಅಂದೋರ್ ದಿವಸ ನಾನೂ ತೆಳಚ, ಕಳಚ  
ಕಾಲ ಕಯಿಚ, ಕಂಡಯಿನ ಈಯಾಳಚಿಟ್ಟ  
ಇಂದ್ ಈ ಗತಿ ನಾಕ್ ತೊಂಬದ್ ಬಯತ್‌ರ ನಿರ್ಗತಿ

ಇಂದ್ ಕಾಲತ್‌ರ ಅಧೋ ಗತಿ  
ಪಲ್ಲೆ ಇಪ್ಪಕ ಕಡಲೆ ಇಲ್ಲೆ  
ಕಡಲೆ ಇಪ್ಪಕ ಪಲ್ಲೆ ಇಲ್ಲೆ  
ಎಡೆಲ್ ಬಂದದ್ ಎಡೆಲೇ ಪೋಚಿ

ಪಣ್ಣೆಲೆ ಬೂವಕ ಪಚ್ಚೆಲೆ ತೆಳಿಪ  
ಪಚ್ಚೆಲೆಕೆನ್ನ ಗೂತ್‌ ತಾನ್ ಪಣ್ಣಾಪದ್  
ಎನ್ನಂಗಪ್ಪ ಈ ತೆಳಿ ನನ್ನ ನೋಟಿಯಂಡೇ ಈ ಕಳಿ.

\* \* \* \* \*

## ಭಂಡ

ತೊಂಡನಾಚೆಂಗಿಯೂ ಭಂಡನಾಯಿತಿಪ್ಪಕ್ಕಾಗ  
ಪುಂಡ ಪೊರ್ಕಿಯಡ ಸಹವಾಸ  
ಪಂಡಂಜೇ ಪೋಗ

ಕಂಡ ಕಂಡಯಿಂಡ ಕೂಡೆ ಪುಂಡ್ ಪುಕಾರೇ ಏರ  
ಎಕ್ಕಲೂ ಪೋಲೀಸ್‌ಕ್ ಇಯಂಡದೇ ಬೇರ  
ಇನ್ನತವು ಇಂದ್ ಈ ಲೋಕಕ್ ಭಾರ  
ಕೊಟ್ಟಂಡು ಇಯಂಗಕ್ ತಾರಾಮಾರ.

ಎಳೆದೊಂಡು ಈಂಡ ವಿಷಯತ್ ಚೆನ್ನಂಗ್ ಕಾರಾ  
ಅಯೆಕೊಂಡು ಈಯನ ಭಾರಿ ದೂರ

ನಲ್ಲವಂಗ್ ಒರ್ ಚೊಲ್ಲ  
ನಲ್ಲ ಎತ್ತಕ್ಕೋರ್ ಕೋಲ್  
ಪಲ್ಲ ಬರತಾಂಡ ನೋಟೊಂಡು ಬಾಲ್

ಪಿಲ್ಲ ತಿಂದಕಲೂ ತಪ್ಪದ್ ಪಾಲ್  
ಇಚ್ಚಕೂ ಬುದ್ಧಿ ಇಲ್ಲತ ಬಂಡ  
ಮನುಷಂಡದೊರ್ ಬಾಳ್  
ತೊಂಡನಾಚೆಂಗಿಯೂ ಭಂಡನಾಯಿತಿಪ್ಪಕ್ಕಾಗ.

\* \* \* \* \*

## ತಂಗಳಿ

ಓ. . . ಬೀಜುವ ತಂಗಳಿಯೆ  
ಇದೆನ್ನ ನೀಡ ಮಹಿಮೆ  
ಇಲ್ಲಿಯೂ ಆಯಂಡುಂಡ್ ನಂಗಡ ಜನಡ  
ಆಯಿಮೆ, ಕೋಯಿಮೆ  
ನೀ ತರಂಡು ನಾಕ್ ಕ್ಷಮೆ.

ನೀ ಬೀಜುವ ತಂಪುಕ್ ನಂಗ  
ಮಾನವಂಗ್ ಲೋಕತ್ ಸೃಷ್ಟಿ  
ನೀನ್ ಚಾಯಿಲ್ ಬೆಪ್ಪಿಯಾ  
ನಂಗಡ ಮೇಲೆ ನೀಡ ದೃಷ್ಟಿ

ಆಂಗಾಯಿತೆ ಬೊಳಿವ ಇಲ್ಲಿ  
ಜನಡ ದುಷ್ಟ ಪುಷ್ಟಿ  
ತೆಕ್ಕ, ಬಡ್ಕ, ಕೇಕ್, ಪಡ್‌ಂಇಗಾರ್  
ನೀನ್ ಬೀಜುವಕ ನೀಕದ್  
ಒರೇ ಮಾರ್  
ಇದೆನ್ನೆ ನೀಕ್ ಈ ಲೋಕತ್ ಕಾರ್ಬಾರ್  
ಈ ಭೂಮಿರ ಮೀದಲ್ ಇಂದ್  
ನೀನೇ ಬಾರಿ ಜೋರ್.

\* \* \* \* \*

## ಕೊಡಲಿರ ಪೋಯಿತ್

ಕೊಡಲಿರ ಕಾತ್ಕ್ ಗಿಡಮರ ಪೋಯಿತ್

ಕಾಡ್ ನಾಡಾಯಿತ್

ಕೊಡಗ್ ಪರಿಸರ ಕಥೆಲ್ ಮಾತ್ರ

ವ್ಯಥೆಯಾಯಿ ನಿಂದಿತ್

ದೇವ ಕಾಡಾಯಿತಿಂಜ ಕಾಡೆಲ್ಲ

ದಾಡದೊ ಪಾಲಾಯಿತ್

ದೇವ ಕಾಡಲಿಂಜ ಕಾಡ್ ಮರ ಎಲ್ಲಾ

ಪರ ಊರ್ ಸೇರಿ ಪೋಯಿತ್

ನೆಲ್ಲ ಬೊಳೆಯುವ ಕೊಲ್ಲಿಲ್ಲೆಲ್ಲಾ

ಕಲ್ಲೆರಂಜಿ ಪೋಯಿತ್

ನೆಲ್ಲರ ಬದಲ್ ಇಂಜಿ ಬೊಳೆರ

ಸಾಲ್ ಸಾಲಾಯಿತ್

ಇಂಜಿ ನಟ್ಟ್ ನಟ್ಟ್ ಬೇಲ್ ಬಾಣೆ

ನಂಜಿ ಪುಡ್ಚಿ ಪೋಯಿತ್

ವಲಸೆಕ್ಕಾರ ಎಲ್ಲಿಂಜೊ ಬಂದವು

ಕೊಂಜಿ ಕೊಂಜಿಯಂಡಳತಿತ್

ಪೇಟೆ ಕೋಟೆಲ್ ಕೊಲ್ಲು ಕೊಲೆ

ಅದಿಯಾಯಿ ಪೋಯಿತ್

ಕಳ್ಳ ಕದೀಮಂಗ ನಾಡ್ ಮೂಲೆ

ಮೂಲೆಯೂ ದುಂಬಿ ಪೋಯಿತ್

ಪಂಡ್ ಇಂಜ ಕ್ರೋಡ ದೇಶತ್ ಕೇಳಿ

ಇಂದ್ ಇಲ್ಲತಾಯಿತ್

ಪಂಡ್ ಬಂದ ನಲ್ಲ ಬದ್ ಕೆಲ್ಲಾ

ಇಂದ್ ಪೊಟ್ಟಾಯಿ ಪೋಯಿತ್

ತೊಂಡ ತೊಂಡಿಯಡ ನಲ್ಲ ಚೊಲ್ಲೆಲ್ಲಾ

ನಡ್ಕತೇ ಆಯಿತ್

ಪುಂಡಪೋಕರಿಯಡ ಭಂಡ ತಕರಾರ್

ಅದಿಯಾಯಿ ಪೋಯಿತ್

ಕೈತೊತ್ತ ಬೋಡುವ ದೇವರೇ  
ದೂರ ಪೋಯಿ ನಿಂದಿತ್

ದೇವಳ ನಂಬತ ಜನಕ್

ದಂಡ್ ಕೊಂಬಾಯಿತ್

ಕೇಳಿ ಪೋನ ಕೊಡವ ಇಂದ್

ಕೇಳಾಯಿ ಪೋಯಿತ್

ಕಾಳ್ ಕಡ್ಡಿ ಅಕ್ಕಿ ನುಚ್ಚಿಕ್.

ಬರಬಂದ್ ಪೋಯಿತ್

ಕೇಳಾಂಡ್ ಪೊಜ್ಜ ಮಳೆಯೂ

ಇಂದ್ ಇಲ್ಲತಾಯಿತ್

ಕಾಳೆ ಪಂದಿ, ಕರ್ಪ ಪಯ್ಯೂ

ಇಂದ್ ಇಲ್ಲತಾಯಿತ್

ಬಾಳ್ ಬದ್‌ಕ್‌ಲೂ ಏರ ಕಷ್ಟ

ಕಾಂಬಕಾಯಿತ್

ಕೊಡವ ಸೀಮೆರ ಪರಿಸರಕ್

ಕೊಡಲಿ ಪೋಯಿತಾಯಿತ್.

\* \* \* \* \*



# ಲಕ್ಷ್ಮಣ ತೀರ್ಥ

ಇರುಪು ಕುಂದಲ್ ಪುಟ್ಟಿ  
ಪರಿಯುವ ಲಕ್ಷ್ಮಣ ತೀರ್ಥ  
ಇದಲ್ ಕುಳಿಕತ ಭಕ್ತಂಗಡ  
ಈ ಜೀವನ ವ್ಯರ್ಥ

ಅಲ್ಲಿಯೂ ಉಂಡ್ ತಂಗಡ ಸೃಷ್ಟಿಕರ್ತ

ಅಯಿಂಗಳೇ ಶ್ರೀ ರಾಮ, ಲಕ್ಷ್ಮಣ, ಹನುಮಂತ

ಶಿವರಾತ್ರಿಯಂದ್ ಅಲ್ಲಿ ನಲ್ಲ ದಿನ  
ಭಕ್ತಂಗ ಕೂಡಿತಿಪ್ಪ ಆಯಿರಾರ್ ಜನ  
ಕುಳ್ಚಿ ತಳ್ಚಿ ಕಳಿವ

ಮಾಡ್ನ ಪಾಪ ಕರ್ಮತ್ನ

ಕೈ ತೊತ್ತ ಬೋಡುವಿ ಆ ಮಹಾದೇವನ

ಇರುಪು ಕುಂದಂಜಿ ಪುಟ್ಟಿ ಪರಿಂಜ ಲಕ್ಷ್ಮಣ ತೀರ್ಥ

ತಾಂಗಿ, ಜೂಂಗಿ ಒಕ್ಕುವ ತದ್ಧಿಮಿ, ತಕದಿಮಿಂದ್

ಕ್ಗಟ್ಟ್ ಮೂಂದಾಯಿರ ಪತ್ತ್ ಕೆಟ್ಟ್ ಕ್ಕಾಲೆ

ಮರ್ಂಜಿ ಒಕ್ಕಚಿದಾ ಲಕ್ಷ್ಮಣ ತೀರ್ಥ.

ಪತ್ತ್ ಕೆಟ್ಟ್ನ ಮುತ್ತ್ ಕೆಟ್ಟ್ಕಿತ್

ಮುತ್ತ್ ಮುತ್ತಾನ ಪೂ ಬಾಳೆ ಬಾಂಗಿತ್

ಈ ನಾಡ್‌ರ ನಲ್ಲಾಮೆಕಾಯಿತ್

ಪರಿವ ಲಕ್ಷ್ಮಣ ತೀರ್ಥ

ಇದೋರ್ ನಲ್ಲ ತೀರ್ಥ.

\* \* \* \* \*

## ಚಕ್ಕ ಪಣ್ಣ

ಚಿಂಗಾರ ಪೊಟ್ಟಿಲ್ ಚಂಗೀರ ಬೆಚ್ಚನೆಕೆ  
ಚೋದಾನ ಪಣ್ಣದ್ ಚಕ್ಕಪಣ್ಣ  
ಚೂಕ್ಟ್ ನೋಟಲು ಪಣ್ಣಾಪಂದರಿಯಲು  
ಕೆಲಪೈಪು ಅಡಂಗುವಲಾ ಚಕ್ಕಪಣ್ಣ  
ಚೋದಾನ ಬಾಯಿಕ್ ಚಕ್ಕರೆ ಇಟ್ಟನೇಕೆ  
ಚಳೆ ಇರಿಂಜಿ ತಿಂಬಕ್ ಚಕ್ಕಪಣ್ಣ  
ಮುತ್ತಾನ ಮುದಿ ಬಾಯಿ ಮದಿ ಮದಿ ಎಣ್ಣಣೆಕೆ  
ಮರೆಯತೆ ತಿಂಬಕ್ ಚಕ್ಕ ಪಣ್ಣ  
ಎತ್ತಕ್ಕಾರ ಮಕ್ಕ ಎತ್ತಬಾಣೆಲ್ ಕೂಡಿ  
ಒತ್ತೋಮ್ ಕಯಿಪಕ್ ಚಕ್ಕಪಣ್ಣ  
ಕೊರಿಯಂಗೂ ಕೋಡಂಗೂ ಮೇಚಿಲ್ಲತಾಪಕ  
ಮೂಕ್ ಮುರಿಪಲ್ಲ ಚಕ್ಕಪಣ್ಣ  
ಕಾಕೆಕುರುವಿಯ ಕೂತ್ಟ್ ತಳ್ಂದಕ  
ಕಾತ್ ಕನಂಗುಲಾ ಚಕ್ಕ ಪಣ್ಣ  
ಕಕ್ಕಡ ಕಾಲತ್ ಕೂಳಿಲ್ಲೆಂದಾಪಕ  
ಕಕ್ಕುಮೈಕಾಪಲಾ ಚಕ್ಕಪಣ್ಣ  
ಭಿಕ್ಷುಕ, ಬೇಡಂಗ ಕಾಡಾಡಿ ಮೋಪಕ  
ಕಣ್ಣಕ್ ಎಲಂಗುವಲ್ಲಾ ಚಕ್ಕ ಪಣ್ಣ  
ಚಿಂಗಾರ ಪೊಟ್ಟಿಲ್ ಚಂಗೀರ ಬೆಚ್ಚನೆಕೆ  
ಚೋದಾನ ಪಣ್ಣದ್ ಚಕ್ಕಪಣ್ಣ.

\* \* \* \* \*

## ಪೊಂಗುಳ್ಳೆ ನೀ ಕೇಳ್

ಪೊಂಗುಳ್ಳೆ ನೀ ಕೇಳ್ ಈ ನಾಡ ಚೊಲ್ಲ  
ಕಲಿಯುಗತ್ ನೀ ಪುಟ್ಟಿ ನೂರ್ ಕಾಲ ಬಾಳ್  
ಪುಟ್ಟುವಕ ಕಣ್ಣೀರ್ ಜಾವಕಲೂ ಕಣ್ಣೀರ್  
ಪುಟ್ಟಿ ಬಾವಾಂಡ ಮಧ್ಯೆ ನೀ ಅಡಕತಿರ್  
ಪೊಟ್ಟಿ ಪೊಟ್ಟಿ ಪಣ ನೀ ಕಟ್ಟಿ ಬೆಕ್ಕು  
ಪಟ್ಟತ್ತಾನೆರ ಮೇಲೆ ನಿನ್ನಾಟಿ ಕೊಡುಕು  
ಅವ್ವೊ ಅಪ್ಪಂಡ ಚೊಲ್ಲ ನೀ ಚೆನ್ನ ಕೇಳ್  
ಬಲ್ಯಂವೊ ಪರೆಯು ನಿನ್ನ ಆಯಿರಾರ್ ಸಾಲ್  
ಅದೇ ಈ ನಾಡ ನೂಯಿಟೊಂದ್ ಚೊಲ್ಲ  
ಮಂಗಲಾಯಿತ್ ಅಲ್ಲಿ ಬಾಮನೆಲ್ ಕೇಳ್  
ಮನೆದೇವ ಒಡೆಯಂಗ್ ಮಣಂದ್ ಬಾಳ್

ಮಕ್ಕಳಾಗತ ನೀಕ್ ಬಂಜೇಂದ್ ಗೋಳ್  
ಮಕ್ಕ ಮರಿಯಳ ಪೆತ್ತ ಚಿರಕಾಲಬಾಳ್  
ಪೊಣ್ಣಾನ ಈ ತಡಿ ಪಣ್ಣಾಪಾಂಗ್ ಮಿಂಚ್  
ಪೊನ್ನಾನ ಮುಕ್ಕಣ್ಣನ ಕೈತೊತ್ತ ಕೇಳ್  
ಪೊದ್ದಾನ ಶನಿ ಎಲ್ಲಾ ಪದ್ದಾಯಿ ಪಾರಡ್  
ಬುದ್ದ ಪೋನ ಈ ನನ್ನ ಮುಕ್ಕಣ್ಣನೇ ಕಾಪಾಡ್

\* \* \* \* \*

## ಇದ್ ನಾಡದ್

ನಾಡದೇ ನಾಡದೇಂದ್ ಎಣ್ಣೆ ನಾಡ್ಡೀ ತಿರುಗುವಿಯ  
ನೀಡದೇದ್ ಈ ಜಗತ್ ಕಂಡಿಯ

ಮಕ್ಕ ಮರಿಯಳೂ ನೀಡದಲ್ಲ, ಚೊಕ್ಕಿ ಬಾವತೆ ನೀನ್  
ಲೆಕ್ಕವಿಲ್ಲತ ರೊಕ್ಕವೂ ನೀಡದಲ್ಲ ಮೋನೆ  
ಪೊನ್ನ ಪಣ ಎನ್ನ ನೀಡದಾ ಈ ಜಗತ್ ಸ್ವಂತ  
ಕನ್ನಡಿರ ಮಿಂಚ ಒಮ್ಮ ನೀನಿಂದ್ ನೋಟ್

ಈ ಚಿಂಗಾರ ತಡಿಯೂ ನೀಡಲ್ಲ ಕಂಡಿಯಾ  
ಸೊತ್ತ ಸೊತ್ತಂದೆಣ್ಣ ನೀ ಸಾರುವಿಯಲ್ಲಾ  
ಸೊತ್ತೇದ್ ನೀಕ್ ನೀಡ ಸ್ವಂತವಾ?

ಚತ್ತ ಮಣ್ಣಾಪಕ ಸೊತ್ತೆಲ್ಲಿ ನೀಡ ಕೂಡ ಬಕ್ಕು  
ಬೆರೀ ಬೆತ್ತಲೆ ನೀ ಮಣ್ಣಾಯಿ ಪೋಕು  
ಪುಟ್ಟುವ ಈ ಜನ್ಮ ಚೆಟ್ಟ ಪತ್ತುವ ಮಿಂಚ  
ಪಟ್ಟ ಬುಡತೆ ನೀ ಮಾಡ್ ಆ ಭಗವಂತಂಡ ಧ್ಯಾನ.

ಈ ಗುಟ್ಟೊಂದ್ ನೀ ಮರ್ಕತಿಂಜಕ  
ಅದೇ ನೀಡ ಚಿರ ಆಸ್ತಿ.

\* \* \* \* \*

# ಪೊಂದೇನ್

ಪರತಿ ಮರತ್‌ಲಳತ್ತ ತೇನ್

ಪಾರುವದೆಲ್ಲಿಕ್ ಎಣ್ಣೆ ತೇನ್

ಪೋರಾಟಕ್ಕಿಂಜ ಶೂರಂಡ ಪೋಲೆ  
ಪೂರ್ಣ ಚಣ್ಣೂರ ಎಲಂಗುವ ಪೋಲೆ  
ಪೊವ್ವದಿಯಮ್ಮೆರ ಬಿಂಬ ಪೋಲೆ  
ಪಾಕಡತ್‌ರ ಪೂ ಮುತ್ತ್ ಪೋಲೆ  
ಪಾರುವದೆಲ್ಲಿಕ್ ಎಣ್ಣೆ ತೇನ್  
ಪರತಿ ಮರತ್ . . . . . ತೇನ್  
ಪಾರುವೋ . . . . . ತೇನ್

ಕೇಡ್ ಕಿಚ್ಚಿ ಎಲ್ಲಾ ನೀಕ್ ಚೆಲ್ಲ

ಕೂಡ್‌ನಲ್ಲಿ ನೀಡ ಪಾಟ್ ನಲ್ಲ

ನಾಡ್ ನಾಡ್‌ಕೆಲ್ಲಾ ನೀನೇ ಮಲ್ಲ

ಪಾರುವದೆಲ್ಲಿಕ್ ಎಣ್ಣೆ ತೇನ್

ಪರತಿ ಮರತ್ . . . . . ತೇನ್

ಪಾರುವೋ . . . . . ತೇನ್

ಮದ್ದ್ ಮರಕ್ಕೆಲ್ಲಾ ನೀನೇ ತೇನ್

ಚದ್ದಿಲ್ಲತವಂಗೆಲ್ಲಾ ಪೊದ್ದ್ ನೀನ್

ಚೋದರಿಂಜ ನಾಕೂ ನೀನೇ ತೇನ್

ಪಾರುವದೆಲ್ಲಿಕ್ ಎಣ್ಣೆ ತೇನ್

ಪರತಿ ಮರತ್ . . . . . ತೇನ್

ಪಾರುವೋ . . . . . ತೇನ್

ಓಡಿ ಓಡಿ ಬಂದ್ ನಿಲ್ಲ ತೇನ್

ನೀನಾಡ ತೊಡಿಯತ್ ನಲ್ಲ ತೇನ್

ನೀಕೊತ್ತ ಪೂವು ಪಾಲು ನೆಲ್ಲ ತೇನ್

ಪಾರುವದೆಲ್ಲಿಕ್ ಎಣ್ಣೆ ತೇನ್

ಪರತಿ ಮರತ್ . . . . . ತೇನ್

ಪಾರುವೋ . . . . . ತೇನ್.

ಪೊಲತ್ ಈ ಕೊಡಗ್‌ನ ನೀ ತೇನ್

ಫಲತ್ ನೀ ಬಾಳ್ ಪಾಲೂ ತೇನ್

ಬೊಳ್ಳ ಈ ನಾಡ್‌ನ ಓ “ಪೊಂದೇನ್”.



# ಓ ಪಟ್ಟತಿ ಪಯ್ಯು

ಓ ಪಟ್ಟತಿ ಪಯ್ಯು ನೀಡಕೂಡ

ನಾಕೆನ್ನಕಯ್ಯು

ಪೊಲಂದ್‌ಕಾಂಬಿ ನಾನಿನ್ನ ಪಾವರ್ತಿ

ತಾಯಿರ ರೂಪತ್

ನೀ ಇಂಜಕಲೂ ಆಯಿರಚತ್ತಕಲೂ ಆಯಿರ

ನೀ ಪೆತ್ತಕ ನಾಕದೇ ಪತ್ತಾಯಿರ

ನೀ ತಂದ ಪಾಲ್‌ರ ಭೀರ್ಯ

ನಾಡತಡಿಕದೇ ಧೈರ್ಯ

ಮಾಗುರು ಇಗ್ಗತ್ತಪ್ಪಂಗ್ ಮಹಾಕಾರ್ಯ

ನೀಡ ಚಾಣಕೂ ಉಂಡ್ ಕೋಟ ಬೆಲೆ

ಬೇಲ್‌ತೋಟತ್ ಬೊಳಿವ

ಪೊನ್ನರ ಬೊಳೆ.

ಈ ನುಂಡ್ ನಾಡ ಸಂಸಾರತ್ ತೆಳಿರಕಳೆ

ನೀಡ ಯರ್ಚಿಕ್ ನಲ್ಲ ಬೆಲೆ

ದ್ರೋಹಿಯ ಮಾಡುವ ನಿನ್ನ ಕೊಲ್ಲೆ ಕೊಲೆ

ನೀ ಬಾಯಿ ತೊರ್ಂದ್ ಎಣ್ಣುವಿಯಾ ಒಮ್ಮೆ

ಓ ನಾಡ ಮಹಾ ಜನಳೇ ಮಾಡತಿ ನಿಂಗ

ನಾಡ ಸಂಸಾರತ್ ರಕೊಲ್ಲೆಕೊಲೆ

“ದಯಮಾಡಿ ನಂಗಡ ಮೇಲೆ, ಮಾಡಿ ಕಾಲೋದಿ

ಗೋರಕ್ಲಾದಿನತ್‌ರ ನಮ್ಮೆ ಕಯಿರಿ

ಓ ಪಟ್ಟತಿಪಯ್ಯು ನೀಡಕೂಡ

ನಾಕೆನ್ನಕಯ್ಯು.....

\* \* \* \* \*

# ಪೊಣ್ಣೆನ್ನ ಆಣೆನ್ನ

ಮಳೆದುಂಬ ಪೊಜ್ಜಕ ಬೊಳೆದುಂಬ ಕೆಟ್ಟೆಂಡು  
ಪಳೆಯಯಿಂಡ ಪೊನ್ನತಕ್ಕ ಅಂದ್ ಕೇಳಿ

ಮಳೆಪೊಜ್ಜಿ ಮೊಳೆದುಂಬಿ ಆಜುಬಾಜು ಕೆಟ್ಟಿತ್  
ಆರ್ಭಟ ಕೂತ್‌ನ ಒಮ್ಮ ಕೇಳಿ

ಪತ್ತಪತ್ತಿತ್ ಚಾಯೋಡೆ ಬದ್‌ಕಂದ್  
ಪಳೆಯ ಪೊನ್ನ ತಕ್ಕ ಅಂದ್ ಕೇಳಿ

ಒಂದೇ ಪತ್ತಿತ್ ಮದಿ ಮಾಡ್ ಮೋಳೆಂದ್  
ಇಂದೇತ ಅವ್ವಂಡ ಪುದುಮೆ ಕೇಳಿ.

ಪೊಂಗುಂಜ್ಜೆ ಪೆತ್ತೋರ್ ಅವ್ವಂಡ ಕೆರಮೂಡ್  
ಪೊಲತಿಪ್ಪ ಕಾರಣ ಎನ್ನ ಕೇಳಿ.

ಆಂಗುಂಜ್ಜೆ ಪೆತ್ತಕ ಆಕೇರಿ ಈ ನಾಡ್‌ನ  
ಕಾಕಿ ಕೂಟುವಾಂಡ ಚಾಯಿ ಕೇಳಿ

ಈ ಕಲಿಯುಗಲ್‌ಲ್ ಪೊಣ್ಣೆನ್ನ ಆಣೆನ್ನ  
ದಂಡೂ ಒರ್‌ಪೋಲೆ ನಿಂಗ ಕೇಳಿ

ಪೊಮ್ಮಕ್ಕ ಇಂಜಕ ಅವ್ವಂಡತಲ್‌ಕ್‌ಲ್  
ಅಳ್‌ತ್ತ ಕಣ್ಣೀರ್‌ಡು ಅಂದ್ ಕೇಳಿ

ಆಣ್ಣಕ ದಂಡೇಂಗಿ ಅವ್ವಂಡ ಬೆನ್ನಕ್  
ಗುದ್ದರ ಸುರಿಮಳೆ ಅಕ್ಕ ಕೇಳಿ

ಆಸ್ತಿ ಪಾಲಾಂಡು ಅರಮನೆ ನಾಕಾಂಡು  
ಎಂದೆಲ್ಲಾ ಪರೆಯುವ ಅವ ಕೇಳಿ

ಇದ್‌ಕೇಟ ಅವ್ವಂಗ್ ಆಣ್ಣಕ್ಕ ಬುಡ್‌ಂಜೋಕು  
ಪೊಂಗುಂಜ್ಜೆರಾಸೆಯು ಬಂದೇ ಬಕ್ಕು.

\* \* \* \* \*

# ಕೋಲ್ ಪೂಯ್ಯವೊ

ಪೂಯಿಲೇ ನಂಗಡ ಪೂಯಿಲೇ ಕೋಲ್

ಪೂಯಲೇ ನಂಗಡ ಪೂಯಿಲೇ ||2||

ಚೆಂಡ್ತೂರೆ ಕೋಲ್ ಪಾತುರೆ ಕೊಲಾಯಿ

ನಾನ್ಳ್ಂಜಕ ಮಂದ್‌ಕ್

ಆರಾಯಿರ ನಾಡ್ ಕೂಡತುಳ್ಳ

ಈ ಪೂಮಾಲೆ ಮಂದ್‌ಕ್

ಕೊಟ್ಟುವೊ ಮೇದಂಡ ಕೊಟ್ಟ್‌ಕ್ ಒತ್ತಿತ್ತ್

ಆಡುವೊ ಯಂಗ ಬಾಲರೋ

ನೊಟ್ಟುವೊ ಪೊಂಗಡ ಚಾಯಿಕೊತ್ತೊರ್

ಕುಂಞ ಮೀಸೆ ಬಾಲರೋ

ಇಗ್ಗುತಪ್ಪಂಡ ಕೋಲಾಟ ಕೊಪ್ಪುಲ್

ಒಗ್ಗನ ಈ ಬಾಲರೋ

ಮಾದೇರಪ್ಪಂಡ ಕೋಲಾಟ ಕೊಪ್ಪುರ

ಮೀದ ನಂಗ ಆಡುವೊ

ಪುತ್ತರಿ ನಮ್ಮೆರ ಕೋಲಾಟ ಕೊಪ್ಪಿದ್

ಎತ್ತರ ನೋಟಿರೋ

ಪಾರಿಪಾರಿ ಪೂಯ್ಯವ ಪೋರಿ ತೊಡೆಯಂಡ

ಜಂಬರ ಒಮ್ಮ ನೊಟಿರೊ

ತಂಬುಟ್ಟ್ ತಿಂಬಕ ಮೀಸೆ ತಡ್‌ತಿತ್

ತಿಂಬಕಯ್ಯತಾಚಿ

ತೇತಾನ ಆ ಮೀಸೆ ಕಾಲ ಪೋನನಕೆ

ಬೊಳ್ಳನೇ ಬೊಳ್‌ತ್‌ಪೋಚಿ

ಪೂಮಾಲೆ ಕೊಡಗ್‌ರ ಪುತ್ತರಿ ನಮ್ಮೆಲ್

ಎನ್ನತ ಬೋಜನೀ ಕಂಡ

ಒಮ್ಮತ ಒಗ್ಗಟ್ಟ್ ಒತ್ತೊರ್ಮೆನ ಕಂಡನೊ

ಜಮ್ಮತ ಈ ಕೊಡಗಲ್

ದಮ್ಮಯ್ಯ ಪುತ್ತರಿ ಒಮ್ಮಲೂ ಪೋಗತೆ

ಇಮ್ಮಕುರಿ ತೊಪ್ಪಿನೊ

ಇಗ್ಗುತಪ್ಪಂಡ ಅಪ್ಪಣೆ ಇಂಜಕ

ಅಯಿರಾಂಡ್ ನಾ ಇಪ್ಪಿನೊ

## ಜೋಡಿ ಪಕ್ಕಿ

ರೆಕ್ಕೆಪುಕ್ಕ ಬಂದ ಪಿಂಞ ಪೋಡಿ ಎನ್ನಂಗ್?  
ದಕ್ಕಚಿ ಈ ತಡಿಕ್ ತೇನ್ ಚೆನ್ನಂಗ್.  
ಬರಿಮೇಲ್ಕ್ ತರಿತರಿಪಕ ಕುಳುರುವ ಚಾಯಿ  
ಸುರುಸುರುಲ್ ಒರ್ತರ ಇಣಾಣತ್ ದೇವಿ.  
ರೆಕ್ಕೆಪುಕ್ಕ ಬಂದ ಪಿಂಞ ಪೋಡಿ ಎನ್ನಂಗ್?

ಮರಿಮಕ್ಕಳಾಯಿತಿಪ್ಪಕ ಅಂದೋರ್ ಚಾಯಿ  
ಮುದ್ದಾನ ಎಡೆವಯಸ್ಸದ್ ಎಚ್ಚಕ್ ಚಾಯಿ  
ಖುದ್ದಾನ ಅನುಭವಕ್ ಒರ್ತರ ಪೇಯಿ  
ರೆಕ್ಕೆಪುಕ್ಕ ಬಂದ ಪಿಂಞ ಪೋಡಿ ಎನ್ನಂಗ್?  
ದಕ್ಕಚಿ ಈ ತಡಿಕ್ ತೇನ್ ಚೆನ್ನಂಗ್.

ಇಂದಿಕ್ಕ ರತಿಮನ್ಮತಂಡದೋರ್ ಜೋಡಿ  
ಮಂಗಲ ಕೈಂಜಪಿಂಞ ಎನ್ನತಪೋಡಿ  
ಮಕ್ಕ ಮರಿಯಳಾನ ಪಿಂಞ ಆಚಿ ಈ ತಡಿ  
ರೆಕ್ಕೆಪುಕ್ಕ ಬಂದ ಪಿಂಞ ಪೋಡಿ ಎನ್ನಂಗ್?  
ದಕ್ಕಚಿ ಈ ತಡಿಕ್ ತೇನ್ ಚೆನ್ನಂಗ್.

ಮನುಷ್ಯ ಜನ್ಮ ತಂದ ಶಿವನ ನೆನೆತಿತೆಣ್ಣುವಿ  
ಇರಡ್ ಇದೇ ಜನ್ಮ ಎಂದೂ ತಲೇಕ್  
ತರಡ್ ಆ ಶಿವ ಆಯಿರಕಾಲ ತಲೇಕು  
ರೆಕ್ಕೆಪುಕ್ಕ ಬಂದ ಪಿಂಞ ಪೋಡಿ ಎನ್ನಂಗ್?  
ದಕ್ಕಚಿ ಈ ತಡಿಕ್ ತೇನ್ ಚೆನ್ನಂಗ್.

\* \* \* \* \*

## ವೀರ ಪಡೆಯಾಳಿ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ

ಕಾವೇರಮ್ಮರ ಆಶೀರ್ವಾದ ಪಡೆಂದ

ಇಗ್ಗುತಪ್ಪಂಡ ಚೊಲ್ಲೆಕ್ ಮಣಂದ

ಬೆಂದು ಚಂಜಾದಿಯಡ ತಕ್ಕಾರಬಯಂದ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ

ದೇಶ ಅಂದ್ ಕೊಂಡಾಡ್‌ಚಿ ಐಂಬದನೆ ಸ್ವಾತಂತ್ರ ನಮ್ಮೆ

ಆಚೇಂಗಿಲ್ಲಿ ನಡಂದಂಡುಂಡ್ ಗರೀಬಂಡ ತಿಮ್ಮೆ

ಜಾಯಿತಕ್ಕರ ಚೊದೇ ಈ ಜನಡ ಭ್ರಮೆ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ

ಪುಟ್ಟಿಯಂಡುಂಡ್ ನಾಯಿಕೊಡೆಕುಮ್ಮರನಕೆ

ದಿನಕ್ಕೊರ್ ರಾಜಕೀಯ ಪಕ್ಷ

ಆಯಂಡಿಲ್ಲೆ ದೇಶತ್ ಬಡಜನಡ ಕೆಲ್ಲ

ರಸ್ತೆರ ಪಾಡಂತೂ ಹೇಸಿಗೇರ ವಾಸ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ

ಪರಿಯುವ ಬಾಯಿಲ್ ದೇಶರಕ್ಷಣೆರ ಘೋಷ

ಸೇನೆಕ್ ಕೊಡುವಲ್ಲಿ ಮಾಡುವ ಮೋಸ

ಕೊಡವಂಗೊಬ್ಬಂಗೆ ಈಂಗುಳ್ಳ ರೋಷ

ಕೊಡವನೆ ದೇಶ ರಕ್ಷಣೆರ ಭಾಷ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ

ನಡಂದತ್ ಅಂದ್ ಕಾರ್ಗಿಲ್ ಕದನ

ತೆತ್ತತ್ ವೀರ ಯೋಧಂಗ ಅಯಿಂಡ ತಡಿನ

ಅಂದಿತೂ ಆಯಿಂಗಿಲ್ಲೆ ನಲ್ಲ ಸುದಿನ

ನಾನೋರ್ ವೀರ ಪಡೆಯಾಳಿ

ಕೊಡಗಲ್ ಪುಟ್ಟನ ಕೋಮಾಳಿ.



# ಮಳೆರಾಯ

ಮಳೆರಾಯಂಡ ಮಳೆ ನಾಕ್ ವಾಲಗ ಪಾಟ್  
ಮಳೆಶುಳಿಕ್ ಕಾಲೆಡ್‌ತ್ ಆಡುವಿ ನೊಟ್  
ತೆಡ್‌ಮಿನ್ಯಂಡ್ ಗುಡುಗುಡ್‌ಗಿಯಂಡ್ ಪೂಮಳೆ ಬಾತ್  
ತೆರಿತೆರಿಚಂಡ್ ಅರಂದಂಡ್ ಆಮಳೆ ಬಾತ್  
ಆದರೆ ಆ ಜಡಿಮಳೆ ಅರಂದಂಡ್ ಬಾತ್  
ಕಕ್ಕಡತ್ ಕರೆಬೇಲ್‌ಕೆಲ್ಲಾ ನೀಬೂಕಿತಾತ್  
ಬಕ್ಕತ್ತ ಬರಿಎಲ್ಲಾ ಜಲ ಎದ್ದೆಬಾತ್  
ಉಕ್ಕತ್ತಳತ್ತೂ ಉಂಬಕ್ ಸೇರೆ ಇಲ್ಲತಾಚಿ  
ಮಳೆ ಇಲ್ಲತೆ ಬೊಳೆ ಬೊಳಿಯತೆ ಲೋಕತೀಕಥೆ  
ಕಳೆದುಂಬಿತ್ ಬೇಲ್‌ಲೆಲ್ಲಾ ಇಂಜಿರಾ ವ್ಯಥೆ  
ಕಂಡಯಿಂಗ ಕರೆಬೇಲ್‌ರ ಚೋದರ್‌ಂಜತ್  
ಉಂಡಕೂಳ್‌ಕ್ ಉಷ್ಟು ಏರಾಂದ್ ಕಥೆ ನೇರಾಚಿ.

\* \* \* \* \*

## ಕವಿರ ಆಸೆ

ಕೊಡಗ್ ಮಲೆರ ಕೇಳಿ ಇಂದ್ ಲೋಕಕೆಲ್ಲಾ ಕೇಳಿ  
ಇಗ್ಗುತಪ್ಪ, ಕಾವೇರಮ್ಮರ ಆಶೀರ್ವಾದತ್ ಬಾಳಿ  
ದೇಶಕಾಪಕ ರೋಷತೆದ್ದಿತ್ ಮೋಸೆ ತಿರುಕುವ ಕೊಡವನೇ  
ಶತ್ರುವಾಳಕ್ ಉಸರ್ ಬುಟ್ಟಿತ್ ಪಡೆಲ್‌ಕಲಂದವ ವೀರನೇ  
ಧೀರಶೂರನು ಕೊಡವ ಬಂಬನ! ಧಾನಶೂರನು ಅವನೇ  
ಪಯಿಚಿ ಬಂದಕ ಪಯಿಪೂ ಅಡಕಿತ್ ಅಯೆಚಿಕೊಡಪಂವೊ ಕೊಡವನೇ  
ನಮ್ಮನಾಳಲು ಮಂದ್ ಮರಿವದ್ ಜಮ್ಮ ಕೊಡಗಲೇ ಕಾಂಗೊಂಡು  
ದಮ್ಮ ಕೆಟ್ಟಿಯಂಡ ಕೋಲ್‌ಪೊಯ್ಯವಕ ದಿಮ್ಮಿತಕದಿಮಿ ಆಡೊಂಡು  
ಉಮ್ಮತಾಟ್‌ರೆ ಚೋದನರಿವೇಂಗಿ ಕೊಡವ ನಮ್ಮೆಕ್ ಪೋಕೊಂಡು  
ಪೊಂಗಮಧ್ಯತ್ ನಿಂದ ಮಾತಾಯಿ ಕಾವೇರಮ್ಮೆನ ಕಾಂಗೊಂಡು  
ನೆರಿನ ಬಯ್ಯಕ್ ಆಂಜಿ ತುರುಕಿತ್ ತಿರಿಂಜಿ ಮರ್‌ಂಜಂಡು ಆಡೊಂಡು  
ಮಂಗಲಾಡಿತ್ ಮುಂದ್ ಮರಿಯುವೊ ಕೊಡವಳೊಂದೆ ಕಾಂಬಾಲಾ?  
ಬಾಳೆ ಬಳಂಬುವೊ, ಸಮ್ಮಂದಡಕುವೊ ಬೋರೆಲೋಕತ್ ಇಲ್ಲೆಲ್ಲಾ  
ಇಂಚೆ ಮಿಂಚಾಕ್ ಪುಟ್ಟುವದಾಚೆಂಗಿ ಜಮ್ಮ ಕೊಡಗಲೆ ಪುಟ್ಟೊಂಡು  
ಇಗ್ಗುತಪ್ಪಂಡ ಆಶೀರ್ವಾದತ್ ಕೊಡವನಾಯಿತ್ ಪುಟ್ಟೊಂಡು  
ಅಮ್ಮೆ ಆ ತಾಯಿ ಕಾವೇರಮ್ಮೆರ ತೀರ್ಥ ಕುಳಿಚಂಡ್ ಬಾವೊಂಡು

\* \* \* \* \*

## ಮಲ್ಲಿಗೆ ಮಮ್ಮ

- ಕಣ್ಣ : ಬೆಪ್ಪು ನಾಡಕ್ಕಾರಿ ಮಲ್ಲಿಗೆ ಮೂಡಿರ ಒಪ್ಪುವ ಒಡೆಯನಾನೊ  
ಚಪ್ಪೆಂಬೂವು ಮಾಲೆ ಘಮಘಮ ಏಣ್ಯಂಡ್ ಎಪ್ಪರ ನೀಪೊರಟ
- ಮೂಡಿ : ಕನ್ನಿಮೂಡೀಂದೆಣ್ಣಿ ಕಣ್ಣೆಟ್ಟ್ ಬಂದಿಯ ಮುದಿಕೊಣು ನೀಕೆನ್ನಂಗ್  
ಮಂಜಣೆ ಮಾಡಿತ್ ಮಾದ ಕೈಪಿರ ನಿಂಗಡ ಈ ಬುದ್ಧಿಯೊ?
- ಕಣ್ಣ : ಮೊಣ್ಣೆ ಕಾಲ್ನೀಡ ಬಣ್ಣತೆ ನಾಕಂಡ ಮುದಿಬಯತ್ ಮರಂದನೊ  
ಬಣ್ಣ ಕೈಬೀಜಿ ಎಣ್ಣತೇ ಪೋಪಿಯ ನಿಲ್ಲಲ್ಲಿ ನಾ ಬಪ್ಪಿನೊ
- ಮೂಡಿ : ಬಪ್ಪದು ಬೊಂಡಲಾ, ತಪ್ಪದೂ ಬೊಂಡಲಾ ಇಪ್ಪರನೀಬರತೆ  
ಗಪ್ಪುಬಾವ ನಾಡ ಪಟ್ಟಳಕಾರನೊ ನೀ ಒಮ್ಮ ಪ್ಪೊ..ಮುದಿಯ
- ಕಣ್ಣ : ಗಪ್ಪುಬಾವಂಗಿಂಜಿ ಜಾಯುಳ್ಳ ಈ ತಡಿ ಮುದಿಮುದಿ ಯಾಯಿತಿದಾ  
ಪುಳಂಜೆ ಮರತ್ ವಯಸ್ಸಾನ ಕಾಲತ್ ಪುಳಂಜೆ ಪುಳಿ ಎನ್ನನೆಯೊ
- ಮೂಡಿ : ಪುಳಂಜೆಯು ಪಣಪುಳಿ ಎನ್ನಂಗ್ ನಾಕಿಕ್ಕ ಬಟ್ಟೆಕಡ್ಡಬರತೆ  
ಪೊಂಜಿ ಚಕ್ಕೆಪಣ್ಣ್ ಪಿಂಜಿ ಎಡ್ಪಂಜಿಜಂಗಿ ಓಂಗಿ ಪೊಯ್ಯವಿ.
- ಕಣ್ಣ : ಅಯ್ಯೊ ಮಮ್ಮ ಮೂಡಿ ಬಯ್ಯತೆ ನೀನನ್ನ ಪೊಯ್ಯತೆ ದಮ್ಮಯ್ಯ  
ಕೈಯ್ಯತಕಾಲತ್ ಕೈಪುಡಿಪ ಕಾಸೆಲಾ ಕೈಒಮ್ಮ ನೀ ತಪ್ಪಿಯ
- ಮೂಡಿ : ಕೈ ಬುಡ್ ಮುದಿಯನೇ ತಂಡೂತಪ್ಪಿ ಮುಂಡತೇ ನೀ ತೊಲಂಗ್  
ಕೈಬುಡತೆ ಪೋಚೆಂಗಿ ನಿನ್ನಡ ದವಡೆಕ್ ನಾ ಕೈ ಬೆಪ್ಪಿನೊ
- ಕಣ್ಣ : ಅಯ್ಯೊಯ್ಯೋ ದಮ್ಮಯ್ಯ ಪೊಯ್ಯತೆ, ನಾನೇ ನೀಡ ಗಪ್ಪು ಬಾವನೊ  
ಪಟ್ಟಾಳತ್ಂಜ ರಜತ್ ಬಂದ ನಿನ್ನ ಕಾಂಬಕಾಯಿತ್.

\* \* \* \* \*

## ಕಲಿಯುಗತ್ ಪೊಣ್ಣೆ

- ಕೊಣ್ಣೆ : ದಂಡ್ ಜಡೆಕ್ಕಾರಿ? ನೀ ಮುಂಡತೇ ಪೋಪ ಎಲ್ಲಿಕ್  
ಮಂಡೆ ಅಡಿಕ್ಕಾಯಿ ದುಂಡ್ ತಿರಿಕಿಯಂಡ್ ಕಂಡವು ಎನ್ನಣ್ಣವೊ
- ಮೂಡಿ : ಈ ಭಂಡಬಾಕೆನ್ನಂಗ್ ನೀ ಬೊಂಬಡ ಬಡಿಪ್ಪಿಯ  
ಗಂಡ್ಭೀರಿ ನಾನೊಂದು ಅಲ್ಲ. ಪೋ..ನೀ ನೀಡ ಬಟ್ಟೆಕ್
- ಕೊಣ್ಣೆ : ಕಂಡವು ದಾರೇಂಗಿ ಮಂಡೆಬಡಿಕ್ಕುಲ ಕುಂಡ್ಕ್ ನೀ ಬೂವತೇ  
ಪುಂಡ್ ಪೋಕಿರಿಯ ನೀಕಡ್ಡ ಬಕ್ಕುಲಾ ನಾನೀಕ್ ತೊಣೆ ಇಪ್ಪಿನೊ
- ಮೂಡಿ : ಪುಂಡಂಗ ಬಂದಕ ಕಾಲಡ್ಡ ಇಟ್ಟಿತ್ ಮಂಡೆ ಒಡೆಪ್ಪಿ ನಾನೊ  
ನೀನೊಬ್ಬನಲ್ಲತೆ ಪುಂಡಂಗಲಾರೂ ನಾಕಡ್ಡ ಬಾರಾಲಾ
- ಕೊಣ್ಣೆ : ಪೊಡೆಯ ನೆರಿ ಬೆಚ್ಚ ಪಿಂಞ ಪೊಣ್ಣೆ ನೀ ಪೊಣ್ಣೆನ್ನೆ  
ಮೂಡಿ : ಪೊಡೆಯ ಉಡ್ತ ಮಾತ್ರಕ್ ಅಡೆಗೆಮನೆಲೇ ಇರಂಡುವಾ  
ಬಾಕಿಪಣಿಕೆನ್ನ ಕೇಡೋ
- ಕೊಣ್ಣೆ : ಮದಿಮದಿ ಪೊಂಗಲೇ ಅದಿಯಾಚಿ ನೀಡ ತಕ್ಕ  
ಈ ಕೊದಿಯನ ಕಾಲತ್  
ಕೊಡವ ಕನ್ನಿಯವ ಕೊಡಗಲ್ ನೀ ಬಾಳ್  
ಆ ತಾಯಿ ಕಾಪಾಡಡ್

\* \* \* \* \*

## ಮಾಯಿಯು ಮೈಮಳು

- ಮಾಯಿಯು ಪೊಣ್ಣೇ ಮೈಮಳು ಪೊಣ್ಣೇ  
ಮೈಮಳಾನವಕ್ ಮಾಯಿರ ಪಟ್ಟ ಉಂಡೇ ಉಂಡ್.  
ಮರೆಯತೆ ಇರ್, ಓ ಮೈಮಳೇ  
ಮಾಯಿಕ್ ಕೊರೆ ನೀ ಕಾಟತೆ  
ಪಣ್ಣಾನ ಆ ತಡಿಕ್ ಪುಣ್ಣಾತ ಮಾದರಿ  
ಕಣ್ಣಾಕ್ ಕಣ್ಣಾಯಿ ನೀ ಎಡ್ತ್ ಚಾಕ್  
ಬಣ್ಣೆ ಕಾಲ್ಲ್ ಬುಡತೆ ಗೊಣ್ಣೆ ಮೂಕಾಯಿರತೆ  
ದೊಣ್ಣೆ ಕುತ್ತಿ ನಡಪಕ ಕುತ್ತನೀ ಪರೆಯತೆ  
ಬಾವೊ ಕಾಲತ್ ಮಾಯಿ ಏವಬೂವದು ಕಾಂಗೂ  
ಕೂವ ಕಂಡಿಕ್ ದಯ ಬೆಚ್ಚಿ ಅಯೆಕತೆ  
ಬಾವೊ ದಿನ ಕೆತ್ತಣೆ ದೇವಳ ತೊತ್ತಂಡಿರ್  
ಮಾಯಿನ ಚಾಕ್ನ ಫಲ ದೇವ ನೀಕ್  
ಕೆಟ್ಟಿಬೆಚ್ಚ ಕೂಪದಿ

# ಚಾಕ್ರಿರ ಶೋಕಿ

ಸರಕಾರಿ ಚಾಕ್ರಿರ ಸರದಾರನೊಬ್ಬಂಗ್  
ತರಕಾರಿ ತಿಂದಿತ್ ಮದಿಯಾಚಿ  
ಎಕ್ಕಲೂ ಬಾಯಿಕ್ ಮಕ್ಕರೆ, ಮಕ್ಕರೆ  
ಚಕ್ಕರೆ ತಿಂಬಕ್ ಕೊದಿಯಾಚಿ  
ತಿಂಗಕ್ ಸಂಬಳ ಅಂಜಾಯಿರ ಎಣ್ಣಳ  
ತೆಂಗ್ ಕೂಟತೇ ಕರಿಯಾಚಿ  
ತಿಂಗದುಂಬವಕ ಕೈದುಂಬ ಪಣ ಕ್ಷು  
ತಿಂದಾನ ಕೊಡ್ಪಕೇ ಸರಿಯಾಚಿ  
ತಂದದೂ ತಿಂದದೂ ಅಟ್ಟದೂ, ಚುಟ್ಟದೂ  
ತೀಂದಿತಾ ಜೇಬೆಲ್ಲಾ ಖಾಲಿಯಾಚಿ  
ಚಾಕ್ರಿಕಾರಂಡ ಶೋಕಿರ ಕಳಿಯೆಲ್ಲಾ  
ತಿಂಗ ಆಕೀರಿ ಕೆತ್ತಣಿ  
ಸಂಬಳ ಕಟ್ಟಿತ್ ಕಂಬಳ ಕೈಪದ್  
ಉಂಬಳ ಮನೆಕೆತ್ತಣಿ  
ದಂಬಡಿ ಪಣತ್ಕ್ ಇಂಬುಡಿ ನೈಕಂಡು  
ಮೊಲಂದಿತ್ ಬೈಟಾಕಣೆ  
ಚಾಕ್ರಿರ ಪುದುಮೆ ಮದಿ ಮದೀಂದಾ ಪಲ  
ಶೋಕಿರ ಆ ಕಳಿ ಬೊಂಡಲಾ  
ಒರ್ದಿ ಉಂಡಕ ಒರ್ದಿನ ಪಟ್ಟಣಿ  
ಮೂಂದ್ ನೇರ ಉಂಬಕ್ ಎತ್ತಲೂ  
ಪಾಲ್ಕೂ ನೀರ್ಕೂ ದುಡ್ಡೆ ದುಡಾಂಡು  
ಕಾಲನೂಕಿತೇ ಪೋಗಲಾ  
ಕೊಡವಂಗ್ ಚಿಂಗಾರ ಪಟ್ಟಾಳ ಚಾಕ್ರಿ  
ಪಟ್ಟಾಳಕಾರನೇ ಗಟ್ಟಿಗನೋ  
ಗಡಿಲು ಪಡೆಲೆಲ್ಲಾ ಕಲಂದಿತ್ ಬಾತೇಂಗಿ  
ಕಡೇಕಾಲ ಕೆತ್ತಣಿ ಅಳತ್ತುಂಗಲು  
ಅಪ್ಪಂಡಪ್ಪ ಅಜ್ಜಪ್ಪ ನೈಚಂತ  
ಆಂಜಿಭಟ್ಟಿ ಭೂಮಿಲು ನಂದಾಲು



# ಪೊಣ್ಣೆ ಜನ್ಮ ಒರ್ ಶಾಪ ಎನ್ನಂಗ್

ಪೊಣ್ಣೆ ಜನ್ಮ ಒರ್ ಶಾಪ. ಎನ್ನಂಗ್?

ಪೊಣ್ಣಾಯಿ ಪುಟ್ಟೊಂಡು ಈ ಜಗತ್

ಬದ್‌ಕ್‌ರ ಚೋದ್‌ನ ಅರಿಯಂಡು ಜನಕ್

ಪೊಣ್ಣೆ ಜನ್ಮ ಒರ್ ಶಾಪ ಎನ್ನಂಗ್?

ಪೆತ್ತವ್ವನೂ ಪೊಣ್ಣೆ ಕೆಟ್ಟ ಬಾವವಳೂ ಪೊಣ್ಣೆ

ಪಿತ್ತ ಉಳ್ಳ ಆ ತಡಿರ ಚೋದೋ

ಕುತ್ತ ನೋಟುವೊ ಆ ಬ್ರಹ್ಮಿಗೆ ಅರಿಯ

ಪೊಣ್ಣೆ ಜನ್ಮ ಒರ್ ಶಾಪ ಎನ್ನಂಗ್?

ಪೊಣ್ಣೆ ಆಣ್‌ಕ್ ಅಡೆಯಂಡೂದೇಣ್ಣುವ

ಈ ಬಾಕೆನ್ನ ನೇರಾಸದೋ

ಆಣ್‌ರ ಅರ್ಧಾಂಗಿ ಅವಳೇ ಪೊಣ್ಣೆ

ಪಂಡಾಯಿರ ಕಾಲತ್ ನೀರಾಯಿ ಪರಿಂಜ

ಮಾತಾಯಿ ಕಾವೇರಮ್ಮೆಯು ಪೊಣ್ಣೆ

ಲೋಕ ಮಾತೆ ಸೀತೆಯೂ ಪೊಣ್ಣೆ

ಸತ್ಯ ಹರಿಶ್ಚಂದ್ರಗೊತ್ತ ಚಂದ್ರಮತಿ

ಅವಳೂ ಲೋಕತ್ ಒರ್ ಪೊಣ್ಣೆ

ಸತ್ಯ ಧರ್ಮತ್ ನಡಂದ್

ಒಡೆಯಂಡ ಸೊತ್ತಾಯಿ ಬಾವಂಡು

ಮೂತ್ತೈದೆಯಾಯಿತೂ ಈ ಕ್‌ಭ್ಯೂಮಿಲ್

ಚಿರಕಾಲ ಬದ್ಧಿನೊ

ಪೊಣ್ಣೆ ಜನ್ಮ ಒರ್‌ಸಲ್ಲ ಜನ್ಮ.

\* \* \* \* \*



# ಪತ್ತ್ ಪೆತ್ತ ಮುತ್ಯೆದೆ

ಪತ್ತ್ ಪೆತ್ತ ಮುತ್ಯೆದೆಯಾನ ಪೊಣ್ಣೇ

ಸೊತ್ತೆನ್ನಂಗ್ ನೀಕ್ ಬೊಂಡು

ಪತ್ತ್ ಮಕ್ಕಳೇ ನೀಡ ಮುತ್ತಾನ ಸೊತ್ತ್

ಬೊತ್ತತೆ ನೀನ್ ಈ ಜಗತ್ ಜೀವರಾಶಿಯಕ್

ಚಾಕಿಪೊಲುತುವದೋರ್ ಕಷ್ಟ

ನೂಕಿನೊ ಪೋಗತ ಅಂದೇತ ಆನಾಳ್

ಬಾಕಿಯಾನ ಬರಿ ಕೆಲತ್‌ರ ನೊಂಬಲ

ಶೋಕಿ ತಾನಾಯಿ ಬಪ್ಪ ದಿನ ನೀಕುಂಡ್

ಪಳ್ಳಿಮರತ್‌ರ ಖರ್ಚಿ

ಬೊಳ್ಳಿ ಪಣತ್‌ರ ಖರ್ಚಿ

ಅಕ್ಕಿ ನುಚ್ಚಿರೊ ಖರ್ಚಿ

ಅದಿಯಾಯಿ ಬಂದದಿಲ್ಲೆ ಪಿಂಇಗೊಮ್ಮ ಮರ್ಚಿ

ನೈಪಕಾನದೊ ಮಕ್ಕ

ನೈಕೂಳೇ ಉಂಬದೂ ಅಕ್ಕ

ಕೈಕೈ ಪುಡ್‌ಚಿ ಕೆಯ್ಯುವ ಪಣಿಲೋ ಮಕ್ಕ

ಇಂದೆನ್ನ ಸುಖಿದುಖಿ: ನೀಕಿಕ್ಕ.

\* \* \* \* \*

# ತೊಡೆ ಕೆಟ್ಟು ತುಂಡ್‌ನ ಎತ್ತ್

ಒಡೆಯನಿಲ್ಲ ಕೊರೆ ನೀಕೆನ್ನಂಗ್ ಪೊಣ್ಣೇ  
ಕಡೇ ಕಾಲಕ್ಕಾಪ ಮಕ್ಕಮರಿಯ ನೀಕುಂಡ್  
ಕರೆಸೇರತ ದೋಣಿರ ಬಾಳ್ ನೀಡದ್  
ನಡು ಕಡಲ್‌ಲ್ ಕೈಬುಟ್ಟತ್ ಅವನಂದ್  
ತೊಡೆಗೆಟ್ಟ್ ತುಂಡ್‌ನ ಎತ್ತಡೆನೆಕೆ  
ಬುಡ್‌ಬುಡ್ ಇದೋರ್ ಭೂಮಿತಾಯಿರ ಕಲ್ಪನೆ  
ಚೆಡಿಮಾಡತೆ ಗುಡಿಸುತ್ತಿಬಾ ನೀ ಎಂದೂ  
ಮಾಗುರು ಇಗ್ಗುತ್ತಪ್ಪಂಗ್ ಮಣಂದ್  
ಮಡಕಿ ಬೆಂಬರಿಕ್ ಬೆಚ್ಚೆ ಆ ನೆರಿನ  
ಕೆಡಕ್ ಬಾರತೆ ನೀ ನಡಂದ್‌ಬಾ  
ಅಡಕೇ ಅಡಕೇ ನೀ ಪೊಂಬಣ ಬೆಚ್ಚಕಲೂ  
ಕುಡುಕುವ ನಿನ್ನ ನಾಲ್ ಜನ  
ದುಡ್‌ಕಿ ಬೂವತೆ ನೀ ಪಾತಾಳಕ್  
ಅಡ್‌ಕ್ ಅಡ್‌ಕಾಯಿ ನೀ ಒಮ್ಮೆ ಕಡೇಕ್  
ಕರೆಸೇರುವಿಯ ಒನ್ನಾಂದ್.

\* \* \* \* \*

# ಮೇಕೆ ಮನೆಕ್ಕಾರಿ

ಮೇಕೆಮನೆಕ್ಕಾರಿ ಕಾಕೆ ಮೂಡಿಯೊಮ್ಮ  
ಕಾಕ್‌ಚಿ ನನ್ನ ಆ ಕರೆಕ್

ಕ್ಪುಣಿ ಏರಿರ ಪಾಬೊಳೆ ನೂಕಿಯಂಡ್  
ಜೋಕೆಲ್ ನಾ ಪೋನ ಆಕರೆಕ್

ಶೋಕತಳತ್ತಿಂಜ ಕಾಕೆ ಮೂಡಿಯೊಮ್ಮ  
ತೇಕ್‌ಜಿ ನನ್ನಡ ಈ ತಡಿಕ್

ಲೋಕತ್ ನೀನೇ ನಾಕಾಯಿ ಪುಟ್ಟಿಯ  
ಪೋಕತೆ ನೀ ದೂರದಯ ಬೆಚ್ಚಿತ್

ಕಾಕಿತ್ ಜೂಕಿತ್ ಒರ್‌ಕೋಟಿ ಬೆಪ್ಪಿನೊ  
ಮರ್‌ಪುಲೆ ನಾ ನಿನ್ನ ಎಂದೆಂದಿಕೂ

ಅಪ್ಪನು ಅಪ್ಪನೂ ಇಪ್ಪರ ಬಕ್ಕುಲಾ  
ಬೊತ್ತಿತ್ ನಾ ಎಣ್ಣೆ ಆ ಮೂಡಿಕ್

ಅಪ್ಪನು ಅಪ್ಪನು ಎಪ್ಪರೊ ಪೊಚಲೋ  
ಜಪ್ಪಾರ ಎನ್ನಂಗ್ ಈ ನಂಗಕ್

ಮಂಗಲ ಕೈಯ್ಯಂಗ ಸಂಸಾರ ಮಾಡಂಗ

ಮುಂಗಾಲ್ ಪುಣ್ಣನ್ನೆ ನೀ ಕಟ್ಟಿಯಾ

ಅಂದಿ ಮುಂದಿಯಾಚಿ ಕಣ್ಣಾಕ್ ಇರ್‌ಟಾಚಿ  
ಎಣ್ಣೆ ತಕ್ಕ ಚೆನ್ನ ನೀಕೇಪಿಯಾ

ಬಣ್ಣ ಬರೆಕುತ್ ಬೂಕತೆ ಮಾರಾಯ

ಎಣ್ಣೆತಕ್ಕ ಎನ್ನಂದ್ ಎಣ್ಣೆ ತಾರೋ

ಕಾಕೆರ ತಕ್ಕನ ಮೇಕಿ ಕೊದ್‌ಚನಾ

ಬಾಕೆ ಪರಿಯೊಕ್ ನಾ ಕಳ್‌ಚ

ಜೋಕೆಲು ಎದ್ದಿತ್ ಶೋಕಿನ ಕಂಡೆನೊ

ಉರಂಡಿತ್ ನಾ ಬುದ್ಧ ಕಟ್ಟಡಿಕ್

ಸ್ವಪ್ನತ್ ಕಂಡೆನಾ ಕಾಕೆ ಮೂಡಿನ

ನಡುದಂಡ್‌ಬಾರತೆ ಎದ್ದಳತ್

\* \* \* \* \*

# ಎದ್ದ ಬಾ ಇಗ್ಗತಪ್ಪ

ಎದ್ದ ಬಾ ಇಗ್ಗತಪ್ಪ ಎದ್ದ ಬಾ  
ನೀನಳತ್ತ ಗದ್ದಿಗಂಜ ಎದ್ದ ಬಾ  
ಮಲಮ ಕುಂದೇಶನೇ ಎದ್ದ ಬಾ  
ಧರ್ಮ ಕಾತಳತ್ತ ದೇವನೇ ಎದ್ದ ಬಾ  
ಎದ್ದ ಬಾ ಇಗ್ಗತಪ್ಪ ಎದ್ದ ಬಾ

ಮಲಮ ಕುಂದಾರ ಉಟ್ಟಿಲೇ ನೀಡ ಪಟ್ಟಿ  
ಮಂತ್ರ ಘೋಷರ್ ಸದ್ದೇ ನೀಕ್ ಗಟ್ಟಿ  
ಪಾಲ್ ಪಣ್ಣಾರ ಪಂಚಾಮೃತ ನೀಕೋರ್ ಚಟ್ಟಿ  
ಶ್ರೀಗಂಧ ಸಾಮ್ರಾಣಿರ ಪೊಗೆ ನೀಕೋರ್ ಪೊಟ್ಟಿ  
ಎದ್ದಬಾ ಇಗ್ಗತಪ್ಪ ಎದ್ದಬಾ

ಚಂಡೆಮಣಿಸದ್ದ ಉಂಡೆಕ್ಕಲು  
ಬಂಡ್ ಬಂಡಾನ ಪಾಯಿಸ ಕುಡಿಕೊಲು  
ಪರಮ ಪಂಚ ಕಜ್ಜಾಯ ತಿಂಗೊಲು  
ಹರ ಹರ ಮಾದೇವ ನಿನ್ನ ತುದಿಕೊಲು  
ಎದ್ದಬಾ ಇಗ್ಗತಪ್ಪ ಎದ್ದಬಾ  
ಪೊನ್ನ ತುಲಾಭಾರ ತೂಂಗೊಲು  
ತನ್ನಡ ತಲೆಭಾರ ಕಳೆಯಲು  
ಗಂಧ ಕರ್ಪೂರ ಸಮ್ರಾಣಿ ಪೊಗೆಯಾಯಿ  
ಈನರ ಜನ್ಮ ನಂದಾಪಕ್  
ಮಲಮತ್ ಮಾಗುರುನ ತುದಿಕೊಲು  
ಎದ್ದ ಬಾ ಇಗ್ಗತಪ್ಪ ಎದ್ದ ಬಾ  
ನೀನಳತ್ತ ಗದ್ದಿಗಂಜ ಎದ್ದಬಾ

\* \* \* \* \*

## ಈಶ್ವರಂದ ಆಟ್

ಆಡ್ ಬಾ ಈಶ್ವರ ಈ ಜಮ್ಮ ಕೊಡಗಲ್  
ಆಡ್ ಬಾ ಈ ನೀಡ ಕ್ಬೂಮಿಲ್  
ಆಡ್ ಬಾ ಈ ಕಾವೇರಿ ಮಣ್ಣಲ್  
ಆಡ್ ಬಾ ಈ ಪೊಮ್ಮಾಲೆ ಕೊಡಗಲ್  
ನೀಡ ಆಟ್ಕ್ ತಕ್ಕ ಕೈತಾಳ ಇಡ್ವೊ ಜನ  
ನೀಡ ಸತ್ಯಕ್ ಮೆಚ್ಚಿ ಮರುಳಾಚಿ ಈ ಜನ  
ನೀಡ ಆಟ್ನ ಕಂಡ್ ಬೆರಗಾನ ಈ ಜನ  
ನೀಡ ಯುಕ್ತಿನ ಕಂಡ್ ಕೊದಿಯಾನ ಈ ಜನ  
ನೀಡ ಆಟ್ಕ್ ಕುಂದೊಳ ಕುಲುಂಗುವ  
ನೀಡ ಆಟ್ಕ್ ತೆಡ್ ಮಳೆಯು ತಾನಾಪ  
ನೀಡ ಶಕ್ತಿಲ್ ಮಳೆ ಬೊಳೆಯು ಚಾಯಾಪ  
ನಿನ್ನುಂಡು ನಂಗಡ ಕೂಕುಮೈಕ್ ಕುಳಾಪ  
ನೀನೆ "ಶಿವಾ" ನಂಗಡ ಮಾದೇವ  
ನೀಡ ಆಟ್ಕ್ ಕ್ಬೂಮಿ ಕುಡ್ಂದೋಕು  
ಜಬ್ಬೂಮಿ ಪಾತಾಳಕ್ ತಾಂದೋಕು  
ನೀಡ ಕಾಲಡ್ಕ್ ಕ್ಚ್ಚನವು ಮಣ್ಣಾಲೇ ಮಣ್ಣಾಯಿ ಪೋಕು  
ಮದಿಮಾಡ್ "ಓ" ಶಿವಾ ಅದಿಯಚಿ ನೀಡ ಆಟ್  
ಲೋಕ ಅಳಿಯುವ ಜೋಕೆ ಈ ನೀಡ ಆಟ್ಕ್  
ಇರಡ್ ಇಂಇಂ ಚಿರಕಾಲ ಈ ಭೂಮಿ  
ಬರಡ್ ಜನಕೆಲ್ಲಾ ಕಾಲಭೈರವನ ತುದಿಪ ಪುರ್ಡ್  
ಅಡ್ಬಾ ಈಶ್ವರ ಈ ಜಮ್ಮ ಕೊಡಗಲ್  
ಆಡ್ಬಾ ಈ ನೀಡ ಕ್ಬೂಮಿಲ್.

\* \* \* \* \*

## ಬೋರೆ ಏದ್ ಸಾಟಿ

ಅಂದೊಮ್ಮ ಪೋಯಿತಿಂಜ ನಾನ್ ಮಲ್ಮಕುಂದ್ ಉಟ್ಟಿಕ್  
ಅನ್ನನೇ ಕಡ್ಂದ ನಾನ್ ಇಗ್ಗತ್ತಪ್ಪಂಡ ಪಟ್ಟಿಕ್  
ಸೂರ್ಯದೇವ ಉದಿಚಿತ್ತಿತ್ ಮಂಡೆರ ಉಟ್ಟಿಕ್

ಮೂಂದ್ ಲೋಕತ ಒಡೆಯ ಮುಕ್ಕಣ್ಣನ ಕಂಡನೆಕೆ  
ಕ್ಬೂಮಿಕ್ ಅಡಿಲುಳ್ಳ ಪಾತಾಳ ಪೂಂದನೆಕೆ  
ಉಯ್ಯವಯ್ಯೊ ನಾಕಾನ ಆನಂದ ಒಮ್ಮ ಕೇಳಿ  
ತೆಕ್ಕದಿಕ್ಕುಲೂ ಕೇದತುಳ್ಳ ಇಗ್ಗತ್ತಂಡ ನೆಲೆಕಂಡ  
ಕೇಕ್ ದಿಕ್ಕಲೂ ಬ್ರಹ್ಮಗಿರಿನ ದೂರತ್ಂಜೇ ಕಂಡ  
ಬಡಕ್ ದಿಕ್ಕಲೂ ಇಗ್ಗತ್ತಪ್ಪಂಡ ಪಾಡಿನೆಲೆನೊ ಕಂಡ  
ಉಯ್ಯವಯ್ಯೊ ನಾಕಾನಾ ಆನಂದ ಒಮ್ಮ ಕೇಳಿ

ಮಜ್ಜಣ ನೇರತೇ ಗೀಜೆಯಡ ಸದ್  
ಗೆಜ್ಜೆ ಗಿಲಿಗಿಲಿ ಎಣ್ಣನೆಕೆ ಆ ಸದ್  
ಕೊಲ್ಲಿ ನೀರ್ ಪರಿವದೊ ಜೋರಾನ ಸದ್  
ಕುಡಿಚಕೊ ಕೊದಿಪೋಗ ಆ ಪನ್ನೀರ್ ಮದ್  
ಉಯ್ಯವಯ್ಯೊ ನಾಕಾನಾ ಆನಂದ ಒಮ್ಮ ಕೇಳಿ

ಮಲ್ಮತ್ಂಜಿ ಕೇದಕ್ ನಾ ಇಳಿಂಜಿ ಬಂದ್  
ಜಾರಿ ಜಾರಿಯಂಡೇ ಕೇದಕ್ ನಾ ಬಂದ  
ಕಡೆಕೊಮ್ಮ ತಿರಿತ್ ಮಲ್ಮಕುಂದ್ನ ಕಂಡ  
ಆಕುಂದ್ ಬಾಂಗಿ ನಿಂದೊರ್ ಚಾಯಿ

ಎನ್ನನೆಲ್ಲಾ ಸೃಷ್ಟಿಮಾಡಿತ್ ಆ ಭೂಮಿತಾಯಿ

ತ್ರೇತಾಯುಗತ್ ತೊಟ್ಟುಕುಂಞ ಗೋಪಾಲ ಕೃಷ್ಣಂಗ್  
ನರ್ಮದಾ ಪೊಳೆ ಕಡ್ಪಕ ಮಳೆರಾಯನ ತಡ್ಪಕ  
ಆದಿಶೇಷ ಕೊಡೆಪುಡ್ಚನೆಕೆ

ಉಯ್ಯವಯ್ಯೊ ನಾಕಾನ ಆನಂದ ಒಮ್ಮ ಕೇಳಿ  
ಅ ಕಾಯಿಚೆ ನಾನೆನ್ನ ನಿಂಗಳೂ ನೋಟಿ  
ಕುಲದೇವ ಇಗ್ಗತ್ತಪ್ಪಂಡ ದಂಡ್ ನೆಲೆನೊ ನೋಟಿ  
ಕೊಡಗ್ಗರ ದೇವಳಕ್ ಬೋರೆ ಏದ್ ಸಾಟಿ

\* \* \* \* \*



# ಬಾ ಒಮ್ಮೆ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಕೈತೊತ್ತ ಬೋಡುವಿ ನಿನ್ನ ದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಪಾತಾಳಶುಳ್ಳ ನೀ ನಾಗ ದೇವ

ಭೂತಳಕ್ ಬೆರಿಯ ಬಾ ನಾಗದೇವ

ಕಾತಳಪಿ ನಾ ನಿನ್ನ ನಾಗದೇವ

ನೀರ್ ತಳಿಪಿ ನಾನೀಕ್ ನಾಗದೇವ

ಪಾಲ್ ತಪ್ಪಿ ನಾನೀಕ್ ನಾಗದೇವ

ನೈವೇದ್ಯವೂ ಬೆಪ್ಪಿ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಕೈತೊತ್ತ ಬೋಡುವಿ ನಿನ್ನ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಅಕ್ರಮ ಅನಿಷ್ಟ ಕಾಂಬ ದೇವ

ನಲ್ಲರಿಕೆ ಇಲ್ಲಿ ಇಲ್ಲೆಲ್ಲಾ ದೇವ

ಸತ್ಯವೇ ದೂರಾಯಿಶ್ ನಾಗದೇವ

ಅಸತ್ಯತಿಂದ್ ಈ ಲೋಕ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಕೈತೊತ್ತ ಬೋಡುವಿ ನಿನ್ನ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಈಶ್ವರಂಡ ಕೃಪೆಯುಂಡ್ ನಾಗದೇವ

ಪಾರ್ವತಿಯ ತೊಣೆಯುಂಡ್ ನಾಗದೇವ

ಭಕ್ತಂಗ ನೀಕುಂಡ್ ನಾಗದೇವ

ಬೋತ್ತಂಡ ಬೆರಿಯ ಬಾ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಕೈತೊತ್ತ ಬೋಡುವಿ ನಿನ್ನ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಷಷ್ಠಿ ಪಂಚಮಿರಂದ್ ನಾಗದೇವ

ನಾನಿನ್ನ ತುದಿಪಿಸೊ ನಾಗದೇವ

ನೀ ಎದ್ದಾ ಓಡಿ ಬಾ ನಾಗದೇವ

ಈ ನೀಡ ಭಕ್ತಂಗ್ ನಾಗದೇವ

ಕೃಪೆಯಿರಡ್ ಮರೆಯತೆ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

ಕೈತೊತ್ತ ಬೋಡುವಿ ನಿನ್ನ ನಾಗದೇವ

ಬಾ ಒಮ್ಮೆ ಬಾ ಒಮ್ಮೆ ನಾಗದೇವ

# ಸೃಷ್ಟಿಕರ್ತ

ವಿಧಿರ ಬಲೆಕ್ ಕಣಿಯತಿ  
ಚದಿ ಎಂದೂ ಮಾಡತಿ  
ಕೊದಿಯಾನ ಈ ಕೊಡಗಲ್  
ಅದಿಯಾಯಿ ಬಾವಂಡುವೇಂಗಿ  
ಅಮ್ಮೆ ಕಾವೇರಮ್ಮೆ ತಾಯಿನೊ  
ಮಾಗುರು ಇಗ್ಗತ್ತಪ್ಪನೊ  
ದಿನಕ್ ಮೂಂದ್ ಕುರಿ ನೆನತೊಳಿ

ದೇವದಿಂದಂಗ ದಾರೂ ಇಲ್ಲೆ  
ಎಣ್ಣದಯಿಂಡ ಎಡ್ಡತನ  
ದೇವನಿಲ್ಲತೆ ದಾರೂ ಇಲ್ಲೆ  
ದೇವ ಮಾಯೆನ ಕಂಡವನೇ ಇಲ್ಲೆ

ಮೂಂದ್ ನಿಮಿಷತ್ ಬಿರುಗಾಳಿಕ್  
ಮೂಂದ್ ಕೋಟಿ ಉರುಪಿಯ ನಷ್ಟ  
ಮರಕಾಡೆಲ್ಲಾ ಒಡಿಂಜಿತ್ ಕಷ್ಟ  
ಇದೆಲ್ಲಾ ಅವಂಡದೇ ಮಾಯೆ  
ಅವನೇ ಈ ಲೋಕ ಸೃಷ್ಟಿಕರ್ತ

\* \* \* \* \*

## ಡೌರಿ

ಕೊದ್‌ಚಿತ್ತೊರ್ ಪೆರಿಗೆಲ್ ನಾ

ಪೊಂಗುಇಸ್ಸ ಪೆತ್ತ

ಆ ಕುಂಇ ನಂದಾಯಿ ಪೊಲಡೇಂದ್

ಮಾದೇವಳ ತೊತ್ತ

ಚಾಕಿತ್ ಜೂಕಿತ್ ಆಳಾಕಿತ್

ಮಂಗಲಕ್ ನಾ ಒತ್ತ

ಚಾಯಿಕ್ ಚಂದಕೂ ಕೊರೆಯಿಲ್ಲತ ಕುಂಇಕ್

ಕ್ಟ್ಚಿ ನಲ್ಲೋರ್ ಬಾಕೆ

ಚಂದೋಳತ್ ಚಾಯಿತೇ ಉರ್‌ಂಡ್‌ಚಿ

ಚೆನ್ನಕಾಲ ಅಯಿಂಡ ನೌಕೆ

ಒನ್ನಾಂದ್ ಮೋವ ತಾಮನೆಕ್ ಬಪ್ಪಕ್

ಕಣ್ಣೋರ್ ಕೈ ಆಯಿತ್ ಬಾತ್

ಕೆದಿಕೆಟ್ಟ ಒಡೆಯಂಡ ಕೆಟ್ಟ ಚಾಳಕ್

ಅವ ನಾಕರಿಚೆಟ್ಟತಾತ್

ಪಣ ಪಣಾಂದ್ ಪಣತ್ ರಾಸೆಲ್

ನಾಕ್ ಚವುಟ್ ಪೊಯಿತ್‌ರ ಸೂರೆ

ಪಣ ಇಲ್ಲತೆ ಬೆರಿಕೈಲ್ ಬಾತೇಂಗಿ

ನಿನ್ನ ಕೆತ್ತಿತ್‌ಡವಿ ಸೂರೆ

ಪೊಣ್ಣ ಪೆರುವೊ ಆಸೆ ಅವ್ವಂಗ್

ಅದ್ ಇಕ್ಕೊಂಡು ನೇರ್

ಆಣ್ಣಕ್ಕ ಡೌರಿಕ್ ಒಂಬಾಡುವದ್

ಇಕ್ಕಿಕ್ಕ ದುಂಬಾ ಜೋರ್

ಕೆಟ್ಟುವೇಂಗಿ ಗರೀಬತ್ ಪೊಂಗಳ

ನಿಂಗಕೆಟ್ಟಿ

ಮಂಗಲಂದ್ ಡೌರಿ ಪಣ ಅವಡ

ಅಪ್ಪನವ್ವಂಗ್ ಕೆಟ್ಟಿ

ಅಂದಕ ಎಕ್ಕೆಕ್ಕಲು ಅಳತ್ ತಿಂಗೊಲು

ಮುಮೂಂದ್ ಒಟ್ಟಿ

\* \* \* \* \*

## ಪೊಂದೇವಿ

ಬಾಣ ಚಣ್ಣೂರ ಕೈಕ್ ಕಟ್ಟುವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ನೀಕಾಯಿ ನಾಡ ಜೀವ  
ನಿನ್ನೆನೆಕೆ ನಾಡ ಬಾವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ಬಾಣ ಚಣ್ಣೂರ ಕೈಕ್ ಕಟ್ಟುವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ನೀಡ ತೆಳೆಯದ್ ಚಾಯಿ  
ನೀಡ ಕಳಿಯು ಅದ್ ಚಾಯಿ  
ಈ ಯುಗ ಯುಗಾಂತರಕ್  
ನೀನೇ ನಾಕ್ ದೇವಿ  
ಎಣ್ಣೆ ಪೊಂದೇವಿ ಎಣ್ಣೆ ಪೊಂದೇವಿ  
ಬಾಣ ಚಣ್ಣೂರ ಕೈಕ್ ಕಟ್ಟುವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ಈ ಪಾಲ್ ನೆಲಚಿಲ್ ನಾಕ್  
ಬಿಸಿ ಪಾಲೆನ್ನಂಗ್  
ನೀಡ ಚೊಂದ ಕಿರಿಯದೇ  
ನಾಕ್ ಪಾಲೂ ತೇನಾಯಿತ್  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ಬಾಣ ಚಣ್ಣೂರ ಕೈಕ್ ಕಟ್ಟುವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ಈ ನೀಡ ತಡಿ ಇಪ್ಪಕ ನಾಕ್  
ತಲೆಮತ್ತೆ ಎನ್ನಂಗ್  
ನೀಡ ಪೂ ಮೇಲದೇ ನಾಕ್  
ಪೂಪರ್ತಿ ಮೆತ್ತೆಯಾಯಿತ್  
ಈ ತಡಿ ಇಪ್ಪಲ್ಲಿಕೆತ್ತಣೆ  
ಬಾನತ್ ತೇಲಾಡನ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ  
ಬಾಣ ಚಣ್ಣೂರ ಕೈಕ್ ಕಟ್ಟುವ  
ಎಣ್ಣೆ ಪೊಂದೇವಿ ನೀ ಎಣ್ಣೆ ಪೊಂದೇವಿ

\* \* \* \* \*

## ಬಣ್ಣತ ಪುತ್ತರಿ ಬಾತ್

ಬಣ್ಣತ ಪುತ್ತರಿ ಎಣ್ಣತೇ ಬಾತ್  
ಅಮ್ಮಂಗು ಕೊಡವಂಗು ಗದ್ದಾಳ ತಾತ್  
ಓಣಿಯು ಕಂಡಿಯು ಒರತ್ ಬೆಚ್ಚತ್  
ಮನೆಕ್ ಚುಣ್ಣ, ಬಣ್ಣ ವಯಕಿತ್  
ಕಚ್ಚಿಮುಟ್ನನಲ್ಲಾ ಕತ್ತಿತ್ ಬೆಚ್ಚಿತ್  
ತೂಕ್ ಬೊಳಚತ್ನನ ಮಿನಿಕಿ ಬೆಚ್ಚತ್  
ಬಣ್ಣತ ಪುತ್ತರಿ ಎಣ್ಣತೇ ಬಾತ್  
ಕುಂಟ ಕುಂಬಾರ ಪಾರಿಯಂಡ್ ಬಾತ್  
ಪುತ್ತರಿ ಕುಡಿಕೆನ ಕೈಯೊಡೆ ತಾತ್  
ಅಂತೋಣಿ ಕೊಂಕಣಿ ಪೊರಿ ಕೊಂಡಬಾತ್  
ಮಕ್ಕ ಮರಿಕೆಲ್ಲಾ ಪೊರಿ ಅಳಂದತ್  
ಪುಟ್ಟಸ್ವಾಮಿ ಪುಣ್ಯತ್ ನೀರೆಡ್ತ್ ಬಾತ್  
ಜಾಂದ್ ಕುರಿಯಾಯಿ ಕೊಡ್ತಿತ್  
ಬಣ್ಣತ ಪುತ್ತರಿ ಎಣ್ಣತೇ ಬಾತ್  
ಮಡಿಯೋಳ ಉಬ್ಬೆಕಟ್ಟ ಚಿಂದಿಯ ಕೊಂಡ್ಬಾತ್  
ಮೀಸೆ ಬಲ್ಯ ಜೋಯಿಮೇದ ಪುತ್ತರಿ ಪಚ್ಚ ತಾತ್  
ಮಾರಂಗಿ ಮಕ್ಕ ಓಲೆಪಲಂಬು ಕೊಂಡಬಾತ್  
ಅಕ್ಕಣೆ ಬಳೆಗಾರ ಸಣ್ಣಪ್ಪ ಬಳೆಯಾಯಿ ಬಾತ್  
ಮುತ್ಯೆದೆಯಕೆಲ್ಲಾ ಬಳೆ ಇಟ್ಟತ್  
ಬಣ್ಣತ ಪುತ್ತರಿ ಎಣ್ಣತೇ ಬಾತ್  
ಅಟ್ಟತ್ ಆಳುದ್ದ ಮರ ಬಾಳೆ ಕೊಲೆ  
ಮಂಜ ತೇಚಳತ್ತಿತ್  
ಪುತ್ತರಿರ ತಂಬುಟ್ಕಾಯಿತ್  
ತಾನೂ ಕಾಕಳತ್ತಿತ್  
ಬರ್ತಕ್ಕಿ ಘಮ ಘಮ ಪಾಯುವ  
ಎಳ್ಳೆ ಕತ್ತಿತ್ ಒಣಕಿತೇ ಬೆಚ್ಚಿತ್  
ಬಣ್ಣತ ಪುತ್ತರಿ ಎಣ್ಣತೇ ಬಾತ್  
ಆದರೆ ಕಾಲತ್ ಐಪಣಿ ಕೆಜ್ಜಂತ  
ಆಳ್ ಬಾಳ್ಕೂ ಗದ್ದಾಳ ಬಾತ್  
ಕೊಟ್ಟನೂ ಮೊಟ್ಟನೂ ನಡಪಾದ್ರೆ ಕೆದ್ದಿತ್  
ಪುತ್ತರಿ ಚತ್ತಕ್ ನಡಂದಿತೇ ಪೋಚಿ

ಉಂಡೆ ಪಿಟಾಕಿಯು ಮಾಲೆ ಪಿಟಾಕಿಯೂ  
 ಓಲೆ ಪಿಟಾಕಿಯೂ ಬ್ಯಾಗ್‌ದುಂಬ್‌ಚಿ  
 ಮಾರಿ ಕೆಲದುಂಬ ಬೊಳ್ಳೆಕಳ್ಳು ಕುಡ್‌ಚಿತ್  
 ಬೊಳ್ಳೆಂಗೂ ಅಬ್ಬೆಕೂ ಕೊಂಡಬಾತ್  
 ಬಣ್ಣತ ಪುತ್ತರಿ ಎಣ್ಣತೇ ಬಾತ್  
 ಅಮ್ಮಂಗೂ ಕೊಡವಂಗೂ ಗದ್ದಾಳ ತಾತ್.

\* \* \* \* \*

## ಓದ್‌ನ ಪೊಣ್ಣಾ

ಓದ್‌ನ ಪೊಣ್ಣಾಂದ್ ವಾದ ನೀ ಮಾಡತೆ  
 ಆ ಭೇದ ಬುಟ್ಟಿತ್ ಬಾ ಈ ಜಗಕ್  
 ಶೋಧನೆ ಇಂಞು ನೀಕುಂಡ್  
 ಪರಿಶುದ್ಧ ಜೀವನಕ್ ಓದೊಂದೇ ಚೋದಲ್ಲ  
 ಕೀದಲುಳ್ಳವು ನಿನ್ನ ಖೇದಪರೆಯುವ ಕೇಳ್  
 ಸೀದನೀ ಬೆರಿಯ ಬಾ ನಾನುಳ್ಳ ಈ ಜಗಕ್  
 ಬೋಧನೆ ಶುರುಮಾಡ್‌ನಕ  
 ಬುದ್ಧ ದೇವನೇ ನಾನಾಪಿ  
 ಪರಿಶುದ್ಧ ಜೀವನಕ್ ಗುಟ್ಟೆಣ್ಣೆ ತಪ್ಪಿ  
 ಬರೀ ಓದೇ ಬರೀ ಪಾಳ್  
 ಈ ಕವಿರ ಕಲ್ಪನೆನ ನೀನೂ ಚೆನ್ನ ಕೇಳ್  
 ಕಣ್ಣೆಲ್ಲತಯಿಂಗೂ ಉಂಡ್  
 ಒಳ್ ಕಣ್ಣಾರಾ ಜ್ಞಾನ  
 ಬಣ್ಣೆ ಬರೀ ಓದೊಂದೇ ನೀಕ್ ಪೋರ  
 ಜೀವನಕ್ ಚೆನ್ನ ಜ್ಞಾನವೂ ಅಗತ್ಯ.

\* \* \* \* \*



# ನಾನ್ ಪಂಜರತ ಗಿಣಿ

ನಾನ್ ಪಂಜರತ ಗಿಣಿ

ಇದ್ ಮಾನವಂಡ ಕುರ್‌ಟ್ ಕೆಣಿ

ಕೇಪಿರಾ ನಾಡ ಈ ಕಥೆನ

ಅದೋ ಅಲ್ಲಿ ಕಾಬ ಕುಂದ್‌ರ ಉಟ್ಟಿಲುಳ್ಳ

ಕರಿಬೂಟಿ ಮರತ್‌ರ ಪೋಟೆಲ್

ಪುಟ್ಟಿತ್ ಬಂದ

ಆ ನಾಡ ಅಪ್ಪನವ್ವ ಅಣ್ಣತಮಣ

ಅಕ್ಕತಂಗಿಯ ಡಾ ಕೂಡ

ನಾಕೂಡಿ ಆಡಿಯಂಡಿಂಜ

ಅಲ್ಲಿಕ್‌ಟ್ಟುವೊ ಪಣ್ಣ್ ಫಲ

ಕಾಯಿಪುಳಿರಾ ಚೋದ್‌ಲ್

ನಾ ಬಾಳಿ ಬದ್‌ಕಿಯಂಡಿಂಜ

ಜೈತ್ರ ತಿಂಗತ್ ಮರತ್ ಚಿಗರೆಲೆ

ಆದ್‌ಲ್ ತರತರ ರಂಗ್‌ರ ಪೂವು

ಅಂಡ ಘಮ ಘಮ ಸುವಾಸನೆಲ್

ಮೈ ಮರಂದಿತಿಂಜೆ

ಜಡಿ ಮಳೆಗಾಲತ ಬೀಜುವೊ ತಂಗಾಳಿಕ್

ಮರತ್‌ರ ಪಾಲಾಟ ನಾಕದ್

ಜೂಂಗುವುಲುಯಾಲೆಯಾಯಿತಿಂತ್

ಅಂದೊಮ್ಮೆ ಬೀಜುವೊ ಬಿರುಗಾಳಿರೆನೆಕೆ

ಒರ್ ದುಷ್ಟಪುಡಚಿ ನನ್ನ ಕೊಂಡಬಾತ್

ಆನಾಡ ಅಪ್ಪವ್ವನ ಸಂಸಾರ ಸುಖಿತ್‌ನ

ಬುಟ್ಟಿತ್ ಕಣ್ಣೋರ್ ಕೈಯಾಯಿತ್ ಬಂದ

ಎನ್ನುಂಡೆಗೆನ್ನ ರೆಕ್ಕೆ ಬೀಜಿ ಬಾಣತ್

ಪಾರಿಯಂಡ್ ಸುಖಿಪಡುವ ಆಸೆನಾಕಿಲ್ಲೆ

ತಪ್ಪು ಮಾಡತೆ ಶಿಕ್ಷೆ ಅನುಭವುಚಿಡ್‌ವೊ ಜೀವ

ಖೈದಿರೆನೆಕೆ ಈ ನಾಡ ಬಾಳ್

ನಾನ್ ಪಂಜರತ ಪಕ್ಷಿ ಗಿಣಿ

\* \* \* \* \*

## ಎಂಜಿಪೊರ್ಕಿಯ

ಎಂಜಿ ಪೊರ್ಕಿಯ ಬಾತ್‌ಎಂಜಿ ತೇಡಿ ಬಾತ್  
ಆಂಜಿ ಆಂಜಿತ್‌ಎಂಜಿ ತೇಡಿಯಂಡ್ ಬಾತ್  
ಕಂಜಿಕೊಡ್‌ತತ್ ಕೊಡವ ಆಂಜ್‌ನ ಎಂಜಿಪೊರ್ಕಿಯಕ್  
ಆಯಿಂಗ ವಲಸೆಕ್ಕಾರಾಂದ್ ಪೆದ್ ಇಟ್ಟತ್  
ಅರ್‌ಂಜತವು ಕೊಡವಡ ವಳಗುಟ್ಟ್‌ನ  
ಇರ್‌ಂಜತವು ಕೊಡವಡ ಮನಸ್ಸರಾಳತ್‌ನ  
ನಂಗ ನಂದಾಪೇಂಗಿಇದೇ ನಾಡ್‌ಂದ್‌ರಂಜ್  
ಬೆಂದ್ ಚಂಜಾದಿಯಳೆನ್ನೆಕೆ ಒಂದಾಯಿ ಕೂಡ್‌ಚಿ  
ಕಂಜಿಕ್ ಬಂದ ಎಂಜಿಪೊರ್ಕಿಯ ಇಂಜಿನಟ್ಟತ್  
ಕೊಡಗ್‌ರ ಮನೆ ಮಕ್ಕಿನೆಲ್ಲಾ ನಂಜಾಕ್‌ಚಿ  
ನಟ್ಟ ಇಂಜಿಯೂ ನಂದಾಯಿ ಬೊಳ್‌ಂದತ್  
ಕಳ್‌ತ್ ನೋಟ್‌ವಕ ಮಾರುದ್, ಗೇಣುದ್  
ಎಂಜಿ ಪೊರ್ಕಿಯಕ್ ಕಂಜಿಯಾಯಿ ಪೋಚಿ  
ಪುಟ್ಟ್‌ಚಿ ಆಸೆ ನಟ್ಟದೇ ಇಂಜಿ  
ಇದ್ ನುಡ್ ಕಾವೇರಮ್ಮೆಕ್ ಮನ ನೊಂದತ್  
ತಾಂಡ ಕಣ್ಣೇರ್ ಮಳೆಯಾಯಿ ಬುದ್ಧತ್  
ನಟ್ಟ ಇಂಜಿಯೂ ಪಾಳಾಕಿತ್  
ವಲಸೆ ಕಾರಳ ಓಡ್‌ಚಿಟ್ಟತ್.

\* \* \* \* \*

# ನರಿ ನಾಡ್‌ಕ್ ಬಪ್ಪ

ಕಾಡ್‌ಲುಳ್ಳ ನರಿ ನಾಡ್‌ಕ್ ಬಪ್ಪ

ಎನ್ನಂಗ್ ಬಪ್ಪ (2)

ಎತ್ತ ಕಡ್‌ಚಿಯಳ ತಿಂಬಕ್ ಬಪ್ಪ

ಬಿತ್ತ ಬೊಳೆನೆಲ್ಲಾ ಪಾಳಾಕಿ ಬೆಪ್ಪ

ಬಟ್ಟೆ ಮೋಕ್‌ಕ್ಕಾರ ಬೊತ್ತಿತ್ತಳ್ಳಪ

ನಾಡ್‌ಕ್ ನಾಡೇ ಬೆರಗಾಯಿಮೋಪ

ಕಾಡ್‌ಲುಳ್ಳ ನರಿ ನಾಡ್‌ಕ್ ಬಪ್ಪ

ಎನ್ನಂಗ್ ಬಪ್ಪ (2)

ಕಾಡೆಲ್ಲಾ ಇಂದ್ ನಾಡಾಯಿ ಮೋಯಿತ್

ಕಾಡ್ ಪ್ರಾಣಿಯಕಿಂದ್ ನೆಲೆಯಿಲ್ಲತಾಯಿತ್

ಪಣ್ಣ್ ಫಲತ್‌ರ ಮರ ನಾಶಾಯಿತ್

ಕಾಡ್‌ಲುಳ್ಳ ನರಿ ನಾಡ್‌ಕ್ ಬಪ್ಪ

ಎನ್ನಂಗ್ ಬಪ್ಪ ಎನ್ನಂಗ್ ಬಪ್ಪ

ಪ್ರಾಣಿಯ ತಿಂಬಕುಳ್ಳದೆಲ್ಲಾ ಅಲ್ಲಿ ಇಲ್ಲತಾಯಿತ್

ಕಾಡ್‌ರ ಜೀವಮಾನ ಪ್ರಾಣಿಯಕ್ ಮದಿಯಾಯಿತ್

ನಾಡ್‌ತೇಡಿ ನಡ್‌ಪಕ್ಕಾಯಿತ್

ಕಾಡ್‌ಲುಳ್ಳ ನರಿ ನಾಡ್‌ಕ್ ಬಪ್ಪ

ಎನ್ನಂಗ್ ಬಪ್ಪ (2)

\* \* \* \* \*

# ಯವ್ವನ ದುಂಬುನ ಆಸೆ

ಯವ್ವನದುಂಬನ ಈ ತಡಿ ನೋಟಿತ್

ಪುಟ್ಟಚಿ ನಾಕ್ ನೂರಾಸೆ

ಜೀವನಜೋಡಿ ಪಕ್ಷಿರ ಮಾದರಿ

ಪಾರಿಕಳಿಪಕ್ ನಾಕಾಸೆ

ಕೆರೆಬರಿ ತೋಟಿತ್ ಪಕ್ಷಿಯಡ ಚಿಲಿಪಿಲಿ

ಕೇಟಂಡೇ ಇಪ್ಪಕ್ ನಾಕಾಸೆ

ಕರೆತೆಂವ ಏರಿಲ್ ಪೊಳೆನ ಕಾಂಬಕ

ಪೊಳೆಯೇ ನಾನಾಂಡುಂದ್ ಆಸೆ

ಪಾರುವ ಪೊಳೆರ ಕೂಡೆನ್ನೆ ಒನ್ನಾಂದ್

ಪಾರಿಪೋಕನಾಂದ್ ನಾಡಾಸೆ

ಇರ್‌ಟ್‌ಲ್ ಮಿನ್ನಂಬುಳು ಮಿನ್ನಿ ಮಿನ್ನಿ ಕಳಿಪಕ

ಮನಸ್ಸಕ್ ಎದೇದೋ ಆಸೆ

ಕರ್‌ಟ್ ಕಾಯಿ ಮರತ್ತಳತ್ತ ಗಿಣಿ ಕುಂಇನ

ಪುಡಿಚಕೆನ್ನಂದ್ ನಾಕಾಸೆ

ಬೊಳ್‌ತ ಬಾವುರಂದ್ ಚಣ್ಣೂರನ ಕಾಂಬಕ

ಕಾಕಿ ತಕ್ಕರಿಚ್ಚಿಡುವ ಆಸೆ

ಬಾಣತ್ ಬೊಳ್ಳಿಯಳೆಲ್ಲಾ ಕೊಯಿತ್

ಮಂಡೇಕ್ ಜೊಡಂಡೂಂದ್ ಆಸೆ

ಕಾಡ್‌ಲ್ ಪಾರುವೋ ಕೇಮಂಡ ಮಾದರಿ

ಪಾರಿ ಪೋಕನಾಂದ್ ನಾಕಾಸೆ

ತೋಡ್‌ಲ್ ಝಳ ಝಳ ಒಕ್ಕುವ ನೀರ್‌ಲ್

ಒಕ್ಕಿ ಪೋಕನಾಂದ್ ನಾಕಾಸೆ

ಬೀಜುವ ಗಾಳಿಕ್ ಮೋಡ ಓಡುವಕ

ಕೂಡೆನ್ನೆ ನಾನೋಡುವಿಂದ್ ಆಸೆ

ಜೋರಾಂದ್ ಪೊಯ್ಯುವೋ ಮಳೆ ತುಳಿರೋಳ್‌ಲ್

ತುಳ್ಳಿ ಕಳಿಪಕ್ ನಾಕಾಸೆ

ಯವ್ವನ ದುಂಬನ ಈ ತಡಿ ನೋಟಿತ್

ಪುಟ್ಟಚಿ ನಾಕ್ ನೂರಾಸೆ

ಜೀವನಜೋಡಿ ಪಕ್ಷಿರ ಮಾದರಿ

ಪಾರಿಕಳಿಪಕ್ ನಾಕಾಸೆ.

# ಕಾವೇರಮ್ಮೆಕ್ ಮಂಗಳಂ

(ರಾಗ : ಆದಿ ಕಾವೇರಮ್ಮೆ)

ಬ್ರಹ್ಮಗಿರಿಲ್ ಪುಟ್ಟಿ ಪರಿಯುವ ಕಾವೇರಮ್ಮೆಕ್ ಮಂಗಳಂ  
ಧರ್ಮರೂಪತ್ ಎದ್ದಕ್ಕತ್ತುವೊ ನಂದಾ ದೀಪಕ್ ಮಂಗಳಂ  
ನೀರ್‌ರೂಪತ್ ಪರಿವ ಮಾತೆಕ್‌ಆದಿಯಾಯಿತ್ ಮಂಗಳಂ

ಇಂದ್ ಜಗತ್ ನಲ್ಲ ಪೆದತ್‌ಲ್ ಉಳ್ಳ ನೀ ಮಾತೆಯೆ  
ಎಂದೂ ಇಕ್ಕಡ್ ಕೊಡವ ಜನತ್‌ರ ಮೇಲೆ ನೀಡ ಪ್ರೀತಿಯೆ  
ನೀನ್ ಪರಿವಕ ನೀಡ ಕರೆಬರಿ ಎಚ್ಚ ಜಾಯಿರ ಬರಿಬರಿ  
ಪಚ್ಚೆ ಪಚ್ಚೆರಸಾಲ್ ಪೊಳೆ ಕರೆಎಚ್ಚಜಾಯಿರತರ ಬೊಳೆ  
ಇಂಞ್ಲೂ ಮಿಂಞ್ಲೂಕ್ ಪರಿಂಜಿ ಪೋಪಕ ಇಂಞ್ಲೂಕೇಪಿಯ ಕೇಳಿನ  
ತೊಲೆಯಾರ್ ಚಂಗ್ರಾದಿರಂದ್ ನಿನ್ನಕಾಂಬಕ್ ಆಸೆಯೊ  
ನೀನ್ ಪಾಂಬಿಯ ತೀರ್ಥ ರೂಪತ್ ಅದಲ್ ಕುಳಿಪಕ್ ಆಸೆಯೊ  
ಅಪ್ಪಂಗವ್ವಂಗ್ ಪಿಂಡ ಬೆಚ್ಚಿತ್ ಮುಂಜೆ ಕುಳಿಪಕ್ ಆಸೆಯೊ  
ಎಂದೂ ಇಕ್ಕಡ್ ನೀಡ ಭಾಷೆಯು ಇಂದ್ ಎಂಗಡ ಜನತೆಕ್  
ಕೊಡವಕ್ಕಲ್ಲಾ ನೀನೇ ತಾಯಿಯು ಲೋಕಮಾತೆರರೂಪತ್  
ನೀಡ ಪಾದ ಪೂಜೆಕಕ್ಕಲುಕಾ ತಂಡಿಪ್ಪವು ಎಂಗಳೊ.

ನಲ್ಲಗುಣತ್‌ಲ್ ನಲ್ಲ ಮನತ್‌ಲ್ ನಿನ್ನತುದಿಪಕ್ ಮನಸ್ಸ ತಾ  
ನೆಲ್ಲೂ ಕಾಫಿರ ಬೊಳೆರ ಸಮಯತ್ ಕಾಲ ಕಾಲಕ್ ಮಳೆಯೂ ತಾ  
ಮುಲ್ಲೆ ಪೂವು ಪೂತ ತರತ್‌ಲ್ ಫಸಲ್ ತಪ್ಪತೆ ನೀನ್ ತಾ  
ನಿನ್ನತುದ್‌ಚಿತ್ ಪಾಟ್ ಪಾಡ್‌ನ ನಾಕ್ ನೀನ್ ಮುಕ್ತಿ ತಾ  
ಬ್ರಹ್ಮಗಿರಿಲ್..... ಮಂಗಳಂ  
ಧರ್ಮರೂಪತ್ .....ಮಂಗಳಂ.

\* \* \* \* \*

## ಗಣಪತಿರ ಶ್ರುತಿ

ತಡಿ ಬಾಂಗಿ ತುದಿಪಿ ನಿನ್ನ  
ಗಜಮುಖಿ ಗಣಪ  
ಮಡಿಯಾನ ಈ ತಡಿಲ್  
ನಾ ನಿನ್ನ ತುದಿಪಿ  
ಎಲ್ಲಾ ದೇವಕೂ ಮಿಂಚಾ  
ನಿನ್ನ ನಾ ತುದಿಪಿ  
ನಲ್ಲ ನೀರುಳ್ಳ ತೆಂಗಿನ  
ನೀಕ್ ಬೆಪ್ಪಿ  
ಚಿಗ್ಗರ್ ಕೊಡಿ ಎಲೆ ಕಳಿ ಅಡಿಕೆತಪ್ಪಿ  
ಸಣ್ಣಕ್ಕಿ ದುಂಬನ ಎಲೆತಟ್ಟೆ  
ನಾ ಬೆಪ್ಪಿ.  
ಈಶ್ವರಂಡ ಮೋಂವನೇ ಓ ಗಣಪ  
ಆದ್ಯ ಪೂಜೆ ನೀಕೇ ಗಣಪ  
ಚೋದ್ಯಕ್ ಎಡೆಮಾಡತೆ  
ಈ ಭೂಮಿನ ಕಾಪಾಡ್ ಗಣಪ  
ತಡಿ ಬಾಂಗಿ ತುದಿಪಿ ನಿನ್ನ  
ಗಜಮುಖಿ ಗಣಪ  
ಮಡಿಯಾನ ಈ ತಡಿಲ್  
ನಾ ನಿನ್ನತುದಿಪಿ.

\* \* \* \* \*



# ಗೋ ಹತ್ಯೆ ಮಹಾ ಪಾಪ

ಗೋ ಹತ್ಯೆ ಮಹಾ ಪಾಪ  
ಬಾವ ಜೀವಕ್ ಗೋವು ಪಾಲೇ ಆಧಾರ  
ಬಾವ ಬಟ್ಟೆಕ್ ಗೋವು ಸುಖಕರ  
ಗೋಹತ್ಯೆ ಮಾಡತಿ ಅತ್ತಳ ತಿಂಗತಿ  
ತಾಯಿ ಪಾಲ್‌ಕೈಂಜಪಿಂಇ

ಪೈಪಾಲೇ ಮನ್‌ಷ್ಯಂಗ ಆಧಾರ  
ಪೈಪಾಲ್ ಕುಡ್‌ಚವಂಗ್‌ಗೊತ್ತ್  
ತಡಿರ ಆ ತಾಕತ್ತ್

ಗೋಹತ್ಯೆ ಮಾಡತಿ ಅತ್ತಳ ತಿಂಗತಿ.  
ಕರ್‌ಪಕುಳ್ಳ ಮನೆ ಅದೇ  
ಒರ್ ಸುಖ ಸಂಸಾರ  
ಪಾಲ್ ಮೋರ್‌ಕುಳ್ಳ ಭೀರ್ಯ  
ಪಂಚಾಮೃತಕ್ಕಿಲ್ಲೆ  
ಕಾಯಿಲ ಕಷ್ಟಕೂ ಪಾಲೇ ಆಧಾರ  
ಗೋಹತ್ಯೆ ಮಾಡತಿ ಅತ್ತಳ ತಿಂಗತಿ.

ಕೊಟ್ಟಾದುಂಬ ದುಂಬಿತಿರಡ್ ಎತ್ತ್‌ಕಡ್‌ಚಿಯ  
ಕಲದುಂಬ ಕಟ್ಟಿಯಂಡಿರಡ್ ಪೈಪಾಲ್  
ಬೂವತ್ತಿರಡ್ ಕೆಟ್ಟಯಿಂಡ ಮೊಟ್ಟೆಕಣ್ಣ್  
ನಿಂದೇ ಪೋಡ್ ಗೋಹತ್ಯೆ ಈ ಕಾವೇರಿ ಮಣ್ಣ್‌ಲ್.

\* \* \* \* \*

## ಪಾಡಿ ಇಗ್ಗತ್ತಪ್ಪ

ಇಗ್ಗತ್ತಪ್ಪನಾ ಬೋಡಿರೋ  
ಮಾಗುರು ಇಗ್ಗತ್ತಪ್ಪನಾ ಬೋಡಿರೋ  
ಕುಲದೇವ ಇಗ್ಗತ್ತಪ್ಪನಾ ಬೋಡಿರೋ  
ಮಲೆಯಾಳತಿಂಜಿ ಬಂದ ಮನೆದೇವನಾ  
ಪಾಡಿಲೇ ನೆಲೆನಿಂದ ಪರಮಾತ್ಮನಾ  
ಬೋಡಿನೊ ಕಾಂಗತ ಶ್ರೀವಾಸನ

ಇಗ್ಗತ್ತಪ್ಪನಾ ಬೋಡಿರೋ  
ವಾಣಪಡೆಲಂದ್‌ಕಲಂದವನಾ  
ಮಾನತೇ ಬದ್‌ಕನ ನಂಭೀಷನ  
ಧಾನಧರ್ಮಕ್ ನೆಲೆಯಾನವನ

ಇಗ್ಗತ್ತಪ್ಪನಾ ಬೋಡಿರೋ  
ಪಾಲೂರಪ್ಪಂಗ್‌ಅಣ್ಣನೂ ಅವನೇ  
ಪನ್ನಂಗಾಲತಮ್ಮೆರ ಸೋದರನವನೇ  
ಬಣ್ಣತೇ ಬಪ್ಪ ಪುತ್ತರಿರಾ ಒಡೆಯ  
ಎಣ್ಣೆತೇ ಬೋಡುವಿ ಆ ಮಹದೇವನ

ಇಗ್ಗತ್ತಪ್ಪನಾ ಬೋಡಿರೋ  
ಕಾಡ್ ಮಲೆರಾ ವಾಸಿ  
ಈ ಕ್ರೋಡಜಗತ್‌ರ ವಾಸಿ  
ಬೋಡುವಜನಕೆಲ್ಲಾ  
ಮಾಡುವ ಪಾಪ ನಾಶ  
ನಾಡೇ ನಾಡ್‌ಕೆಲ್ಲಾ ಅವನೇ ಕೈಲಾಸವಾಸಿ  
ಇಗ್ಗತ್ತಪ್ಪನಾ ಬೋಡಿರೋ  
ಮಾಗುರು ಇಗ್ಗತ್ತಪ್ಪನಾ ಬೋಡಿರೋ

\* \* \* \* \*

## ಪುತ್ತರಿರ ಏಳಕ್ಕಿ ಪುಟ್ಟ್

ಕಾಮವ್ವ ಚೋಮವ್ವ ಅಕ್ಕವ್ವ ಬಾರಿ

ಕಾಳವ್ವ ಮುತ್ತವ್ವ ನಿಂಗಲೂ ಬಾರಿ

ಪುತ್ತರಿ ಪೊಳ್ಳಾರ ಏಲಕ್ಕಿ ಪುಟ್ಟ್

ಮುತ್ತೈದೆ ಅಂಜಾಳೂ ಒಕ್ಕಚೆ ಕೂಡಿ

ಒತ್ತಿತ್ ಕುಟ್ಟನ ಏಳಕ್ಕಿ ಪುಟ್ಟ್

ಓರಾಂಡೆಕ್ಕೋರಮ ಪುತ್ತರಿ ನಮ್ಮೆ

ಇಗ್ಗತ್ತಪ್ಪಂಡ ಪುತ್ತರಿ ನಮ್ಮೆ

ಅಮ್ಮಂಗು ಕೊಡವಂಗೂ ಒತ್ತೋರ್ ನಮ್ಮೆ

ಕಾಮವ್ವ ಚೋಮವ್ವ ಮುತ್ತವ್ವ ಬಾರಿ

ಏಲಕ್ಕಿ ಶುಂಠಿರ ಚೂರೊಂದ್ ಕೂಟಿ

ಕಲ್ಲು, ನೆಲ್ಲು ಚೆನ್ನಂಗ್ ಕೂಟಿ

ಎಳ್ಳು, ಮೆಂತೆಯೊರಚ್ಚಕ್ ಕೂಟಿ

ಚಿಂಗ ಬಾಳೆಪಣ್ಣೆ ಚಾಯೋಡೆ ಕೂಟಿ

ಕುಟ್ಟನ ಏಳಕ್ಕಿ ಪುಟ್ಟ್ನ ನಂಗ

ಕಾಮವ್ವ ಚೋಮವ್ವ ಅಕ್ಕವ್ವ ಬಾರಿ

ಪಾಟ್‌ರರಾಗಕ್ ಚೋದಾನ ಕುಟ್ಟ್

ಚಿತ್ತಾಲ್ ಎಲೆರೊಳ್‌ಕ್ ಇಟ್ಟಿತ್‌ತಟ್ಟ್

ನಕ್ಕಿತ್‌ತಿಂಬವು ನಾವುನ ನೋಟ್

ಆಳಣ್ಣ ತಿಂಬವು ಕೈನ ಕಾಟ್

ಏಳಕ್ಕಿ ಪುಟ್ಟ್‌ರ ಕೇಳಿರ ಪಾಟ್

ಕಾಮವ್ವ ಚೋಮವ್ವ ಅಕ್ಕವ್ವ ಬಾರಿ

ಕಾಳವ್ವ ಮುತ್ತವ್ವ ನಿಂಗಲೂ ಬಾರಿ.

\* \* \* \* \*

## ಕೊಡಗೇ ಚಾಯಿ

ಚಾಯಿಲ್ ಚಾಯಿ ನಂಗಡ ಕೊಡಗೇ ಚಾಯಿ

ಕೇಳಿ ಮಾಜನಳೇ ಜನಡ ಬಾಯಿ ಬಾಯಿ

ನಾಳ್ ನಾಳ್ಕಿಂಜಿ ಕೇಪ ಕೇಳಿಕಿಂಜಿ ಚಾಯಿ

ಕೊಡಗ್‌ಲುಂಡ್ ಅಂಜತ ಮೀಸೆಯ

ನರಿನ ತಳ್‌ತ್‌ನ ಕೊಂಬ ಮೀಸೆಯ

ಆರ್‌ಕೂ ಬೊತ್ತತ ಆಂಗುಣ್ ಮೀಸೆಯ

ಕೊಡವ ಭಾಷೆರ ಚೋದಲೋ

ಎದ್ ಭಾಷೆಕೂ ಮೀತದಲೋ

ಚೇರ, ಚೋಳ, ಪಾಂಡಿನಾಡ್‌ಕ್ಕಿಂಜಿ ಚಾಯಿಲೋ

ಕೊಡವಡ ಆದಿ ದೇವತೆ ಆದಿ ಕಾವೇರಮ್ಮನ

ತುದ್‌ಚಿಕೊದ್‌ಚಚ್ಚಕೂ ಪೋರಲೋ

ಕೊಡವ ಕ್ಕೋರ್ ಪುತ್ತರಿ, ಕೈಲ್‌ಪೋಳ್, ಚಂಗ್ರಂದಿ ನಮ್ಮೆಲೋ

ಇದ್‌ಲ್ ಕಾಂಬ ಒಗ್ಗಟ್ಟ್ ಬೊರೆ ಎಲ್ಲಿ ಕಾಂಗಲೋ

ಆಟ್, ಪಾಟ್, ಕೂಟ್ ಕಳಿಯೋ ನೋಟ್‌ನಚ್ಚಕ್ ಪೋರಲೋ

ನ್‌ಟಿ ಬೀಜುವ ಪಾತುರೆ ಕೋಲ್‌ರ

ಪರಿಯ ಕಳಿಯೊಂದ್ ಬೊರಲೋ

ಪಣೆಲ್ ಪಾಲುಲು ಕೆಯ್ಯುವ ಜನರೊ

ಇಂಜ್ಚಚ್ಚಕೂ ಕಾಂಬಲೋ

ಕೆಣೆಲ್ ಕೋಪುಲ್ ಕೆಣೆಂಜಿಬುದ್ದವು

ತಣೆಯುವದಂತೂ ನೇರ್‌ಲೋ

ಚಾಯಿಲ್ ಚಾಯಿ ನಂಗಡ ಕೊಡಗೇ ಚಾಯಿ

ಕೇಳಿ ಮಾಜನಳೇ ಜನಡ ಬಾಯಿ ಬಾಯಿ

\* \* \* \* \*

# ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಮಡಿಕೇರಿ

2014-2017ನೇ ಕಾಲತ್ ರ ಸಮಿತಿ ಸದಸ್ಯಂಗ

ಬಿದ್ದಾಟಂಡ ಎಸ್. ತಮ್ಮಯ್ಯ	ಅಧ್ಯಕ್ಷ
ಉಮರಬ್ಬ	ರಿಜಿಸ್ಟ್ರಾರ್
ಡಾ   ಮೇಚಿರ ಸುಭಾಷ್ ನಾಣಯ್ಯ	ಸದಸ್ಯ
ಪಡಿಇಗಾರಂಡ ಜಿ. ಅಯ್ಯಪ್ಪ	ಸದಸ್ಯ
ಡಾ. ತೀತಿರ ರೇಖಾ ವಸಂತ್	ಸದಸ್ಯೆ
ಮುಲ್ಲೇಂಗಡ ಬೇಬಿ ಚೋಂದಮ್ಮ	ಸದಸ್ಯೆ
ಚೇರಮ್ಮನ ವಾಣಿ ಚಂಗುವಮ್ಮಯ್ಯ	ಸದಸ್ಯೆ
ಮದ್ರೀರ ಸಂಜು ಬೆಳ್ಳಪ್ಪ	ಸದಸ್ಯ
ಕುಡಿಯರ ಬೋಪಯ್ಯ	ಸದಸ್ಯ
ಮಾದೇಟಿರ ಬೆಳ್ಳಪ್ಪ	ಸದಸ್ಯ
ಮೂಕೈರೀರ ಲೀಲಾವತಿ	ಸದಸ್ಯೆ
ಕಾಳಚಂಡ ಜಿ. ಕಾರ್ಯಪ್ಪ	ಸಹ ಸದಸ್ಯ
ಅಣ್ಣೇರ ಹರೀಶ್ ಮಾದಪ್ಪ	ಸಹ ಸದಸ್ಯ
ಚೋವಂಡ ಎಸ್. ಬೋಪಯ್ಯ	ಸಹ ಸದಸ್ಯ





## ಕವಿ ಕರವಟ್ಟೀರ ಬಿ. ಐಯ್ಯಣ್ಣ

ಕವನ ಎಳ್ತಾರ ಮೀದ ಆಳವಾನ ಜ್ಞಾನ ಅನುಭವ ಇಂಞಚ್ಚಕೂ ಪಡಿಪಕುಳ್ಳ ಪುರ್ಡ್ ಅನ್ನತ ವ್ಯಕ್ತಿನ ಒರ್ ಕವಿ, ಇಲ್ಲೇಂಗಿ ಒರ್ ಸಾಹಿತಿಂದ್ ಎಣ್ಣಲು. ಈ ನ್‌ಟ್‌ಲ್ ಕರವಟ್ಟೀರ ಬಿ. ಐಯ್ಯಣ್ಣ ಇವು ಕವನ ಪಿಂಞ ಸಾಹಿತ್ಯತ್ ಅರ್ಹತೆ ಪಡ್‌ಂದಿತುಂಡ್.

ಕರವಟ್ಟೀರ ಬಿ.ಐಯ್ಯಣ್ಣ ಇವು ಬೆಪ್ಪುನಾಡ್‌ರ ಕಡಂಗ ಮುಂದೂರ್ ಊರ್‌ಕಾರಳಾನ ಕರವಟ್ಟೀರ

ಬೊಳ್ಳಪ್ಪ- ಅಮ್ಮವ್ವ ದಂಪತಿಯಡ ದಂಡನೆ ಮೊಂವೊ. ಚಿರ್‌ಪತ್‌ಂಜೇ ಕಥೆ, ಕವನ, ನಾಟಕ ಎಳ್ಲ್ದವೊ, ಪಾಟ್ ಪಾಡ್‌ವೊ ಇನ್ನತದೆಲ್ಲ ದುಂಬಾ ಇಷ್ಟ. ಪೂಮಾಲೆ ಪತ್ರಿಕೆರ ಎಳ್ತಕಾರನಾಯಿತುಳ್ಳ ಇವು ಇಕ್ಕಾಕಣೆ ಸುಮಾರ್ ಕಥೆ, ಕವನ, ನಾಡ್‌ಮದ್ದಾರ ಪ್ರಯೋಜನತ್‌ನ ಕೂಡಿ ಎಳ್ಳಿತ್. ಅಲ್ಲತೆ ಇಕ್ಕಾಕಣೆ “ನಾಡ್‌ಮದ್ದ” ಪಿಂಞ “ಕೊಡಗ್‌ರ ಮರಕಾಡ್” ಂದೆಣ್ಣುವ ದಂಡ್ ಪುಸ್ತಕ ಬೊಳಿಕಂಡಿತ್. ಇಯಂಗಡ ಪೊಣ್ಣ್ ಬಾಳೆಲೆ ಕಾರ್ಮಾಡ್‌ಕಾರಳಾನ ಪೊನ್ನಿಮಾಡ ಕಾರ್ಯಪ್ಪ ದೇವಕಿ ದಂಪತಿಯಡ ಪೆರಿಯ ಮೋವ ಸೀತಮ್ಮ. ಈ ದಂಪತಿಯಕ್ ದಂಡ್ ಮಕ್ಕ. ಲೋಕೇಶ್ ಪಿಂಞ ದೇಚಮ್ಮ. ಲೋಕೇಶ್ ಇಂಡಿಯನ್ ಆರ್ಮಿಲ್ ಇಕ್ಕಲೂ ಸೇವೆಲುಂಡ್. ಇವು ಸಿಯಾಚಿನ್‌ಕ್ ದಂಡ್ ಕುರಿ ಪೋಯಿತ್ ಅಲ್ಪತ್‌ರ ಭಯಂಕರ ಕಷ್ಟ ಅನುಭವಿಚಿಟ್ಟವು. ಕವಿ ಐಯ್ಯಣ್ಣ ಬಲ್ಯ ನಾಡ್ ಮದ್ದಾಕಾರಳೂ ಅಕ್ಕ. ಇಕ್ಕ ಇವು ಪಾಲಿಬೆಟ್ಟತ್‌ರ ಪಕ್ಕ ಚೆನ್ನಂಗಿ ಗ್ರಾಮತ್ ವಾಸ ಉಂಡ್.

ಇಯಂಗಡ ವಿಳಾಸ,

ಕರವಟ್ಟೀರ ಬಿ. ಐಯ್ಯಣ್ಣ

ಚೆನ್ನಂಗಿ ಗ್ರಾಮ

ಚೆನ್ನಯ್ಯನಕೋಟೆ ಅಂಚೆ

ಮೊ: 9845673952

